

摘藻堂四庫全書薈要

集部

欽定四庫全書薈要

集部

漢魏六朝百三家集卷四十八

詳校官候選知縣臣吳圃華

欽定四庫全書薈要卷一萬九千六百三十七

集部

漢魏六朝百三家集卷四十八

明 張溥 輯

陸機集

賦

文賦 有序

余每觀才士之所作竊有以得其用心夫其放言遣辭
良多變矣妍蚩好惡可得而言每自屬文尤見其情恒

患意不稱物文不逮意蓋非知之難能之難也故作文賦以述先士之盛藻因論作文之利害所由他日殆可謂曲盡其妙至於操斧伐柯雖取則不遠若夫隨手之變良難以辭逮蓋所能言者具於此云爾

佇中區以玄覽願情志於典墳遵四時以歎逝瞻萬物而思紛悲落葉於勁秋喜柔條於芳春心懔懔以懷霜志眇眇而臨雲詠世德之駿烈誦先人之清芬游文章之林府嘉麗藻之彬彬慨投篇而援筆聊宣之乎斯文

其始也皆收視反聽耽思傍訊精騫八極心游萬仞其

致也情瞳矐而彌鮮物昭晰而互進傾羣言之瀝液漱

六藝之芳潤浮天淵以安流濯下泉而潛浸於是沈辭

怫悅若游魚銜鈎而出重淵之深浮藻聯翩若翰鳥纓

繳而隆層雲之峻收百世之闕文採千載之遺韻謝朝

華於已披啟夕秀於未振觀古今於須臾撫四海於一

瞬然後選義按部考辭就班抱景者咸叩懷響者畢彈

或因枝以振葉或沿波以討源或本隱以之顯或求易

而得難或虎變而獸擾或龍見而鳥瀾或妥帖而易施
或岨嵒而不安罄澄心以凝思眇衆慮而為言籠天地
於形內挫萬物於筆端始躑躅於燥吻終流離於濡翰
理扶質以立幹文垂條而結繁信情貌之不差故每變
而在顏思涉樂其必笑方言哀而已歎或操觚以率爾
或含毫而邈然伊茲事之可樂固聖賢之所欽課虛無
以責有叩寂寞而求音函緜邈於尺素吐滂沛乎寸心
言恢之而彌廣思按之而逾深播芳蕤之馥馥發青條

之森森繁風飛而森豎鬱雲起乎翰林體有萬殊物無
一量紛紜揮霍形難為狀辭程才以效伎意司契而為
匠在有無而僂俛當淺深而不讓雖離方而遯圓期窮
形而盡相故夫誇目者尚奢愜心者貴當言窮者無隘
論達者唯曠詩緣情而綺靡賦體物而瀏亮碑披文以
相質誄纏綿而悽愴銘博約而溫潤箴頓挫而清壯頌
優游以彬蔚論精微而朗暢奏平徹以閑雅說煒煜而
譎誑雖區分之在茲亦禁邪而制放要辭達而理舉故

無取乎冗長其為物也多姿其為體也屢遷其會意也
尚巧其遣言也貴妍暨音聲之迭代若五色之相宣雖
逝止之無常固崎錡之難便苟達變而識次猶開流以
納泉如失機而後會常操末以續巔謬玄黃之秩叙故
渙忍而不鮮或仰逼於先條或俯侵於後章或辭害而
理比或言順而義妨離之則雙美合之則兩傷考殿最
於錙銖定去留於毫芒苟銓衡之所裁固應繩其必當
或文繁理富而意不指適極無兩致盡不可益立片言

而居要乃一篇之警策雖衆辭之有條必待茲而效績

亮功多而累寡故取足而不易或藻思綺合清麗芊眠
炳若縟繡悽若繁絃必所擬之不殊乃暗合乎曩篇雖
杼軸於予懷怵他人之我先苟傷廉而愆義亦雖愛而
必捐或若發穎豎離衆絕致形不可逐響難為係塊孤
立而特峙非常音之所緯心牢落而無偶意徘徊而不
能掃石韞玉而山暉水懷珠而川媚彼榛楛之勿翦亦
蒙榮於集翠綴下里於白雪吾亦濟夫所偉或託言於

短韻對窮迹而孤興俯寂寞而無友仰寥廓而莫承譬
偏絃之獨張含清唱而靡應或寄辭於瘁音言徒靡而
弗華混妍蚩而成體累良質而為瑕象下管之偏疾故
雖應而不和或遺理以存異徒尋虛以逐微言寡情而
鮮愛辭浮漂而不歸猶絃么而徽急故雖和而不悲或
犇放以諧合務嘈囀而妖冶徒悅目而偶俗固聲高而
曲下寤防露與桑間又雖悲而不雅或清虛以婉約每
除煩而去濫闕太羹之遺味同朱絃之清汜雖一唱而

三歎固既雅而不艷若夫豐約之裁俯仰之形因宜適
變曲有微情或言拙而喻巧或理朴而詞輕或襲故而
彌新或沿濁而更清或覽之而必察或研之而後精譬
猶舞者赴節以投袂歌者應弦而遣聲是蓋輪扁所不
得言故亦非華說之所能精普辭條與文律良余膺之
所服練世情之常尤識前修之所淑雖濬發於巧心或
受嗤於拙目彼瑀敷與玉藻若中原之有菽同橐籥之
罔窮與天地乎並育雖紛謁於此世嗟不盈於予掬患

挈瓶之屢空病昌言之難屬故蹉跎於短韻放庸音以
足曲恒遺恨以終篇豈懷盈而自足懼蒙塵於叩缶顧
取笑乎鳴玉若夫感應之會通塞之紀來不可過去不
可止藏若景滅行猶響起方天機之駿利夫何紛而不
理思風發於曾臆言泉流於脣齒紛葳蕤以駁還唯毫
素之所擬文徽徽以溢目音泠泠以盈耳及其六情底
滯志往神留兀若枯木豁若涸流攬營魂以探賸頓精
爽而自求理翳翳而愈伏思軋軋其若抽是以或竭情

而多悔或率意而寡尤雖茲物之在我非余力之所勦
故時撫空懷而自惋吾未識夫開塞之所由也伊茲文
之為用固衆理之所因恢萬里使無閼通億載而為津
俯貽則於來葉仰觀象於古人濟文武於將隆宣風聲
於不泯塗無遠而不彌理無微而弗綸配霑潤於雲雨
象變化乎鬼神被金石而德廣流管絃而日新

遂志賦

有序

昔崔篆作詩以明道述志而馮衍又作顯志賦班固作

幽通賦皆相依倣焉張衡思玄蔡邕玄表張叔哀系此
前世之可得言者也崔氏簡而有情顯志壯而泛濫哀系
俗而時靡玄表雅而微素思玄精練而和惠欲麗前人
而優游清典漏幽通矣班生彬彬切而不絞哀而不怨
矣崔蔡冲虛溫敏雅之屬也衍抑揚頓挫怨之徒也豈
亦窮達異事而聲為情變乎余備托作者之末聊復
用心焉

武定鼎於洛汭胡受瑞於汝墳繇鳴鳳於百祀啟敬仲

乎方震苟天光之所照豈舜族其必陳厭裡祀於故墟
饗禴祭於東鄰禰八葉而相茂舞九韶乎降神系姜叟
於海曲表滄流於遠臻仰前蹤之綿邈豈孤人之能冒
匪世祿之敢懷傷茲堂之不構理或睽而後合道有夷
而弗順傳棲崑而神交伊荷鼎以自進蕭綢繆於豐沛
故攀龍而先躍陳頓委於楚魏亦凌霄以自濯伍被刑
而伏劍魏和戎而擁樂彼殊途而並致此同川而偏溺
禍無景而易逢福有時而難學惟萬物之運動雖紛糾

而相襲隨性類以曲成故圓行而方立要信心而委命
援前修以自程擬遺迹於成軌詠新曲於故聲任窮達
以逝止亦進仕而退耕庶斯言之不渝抱耿介以成名

祖德賦

咨時文之懿祖膺降神之靈曜棲九德以弘道振風烈
以增劭彼劉公之矯矯固雲網之逸禽既憑形以傲物
諒傅翼而棲林伊我公之秀武思無幽而弗昶形鮮烈
於懷霜澤溫惠乎挾纊收希世之洪捷固山谷而為量

西夏坦其無塵帝命赫而大壯登具瞻於太階濯長纓
乎天漢解戎衣以高揖正端冕而大觀戢靈武於既曜
恢時文於未煥騰絕風以逸驚庶遐蹤於公旦

述先賦

仰先后之顯烈懿暉祚之允輯應遠期於已曠昭前光
於未戢抱朗節以遐慕振奇迹而峻立在虐臣之貪禍
據西山而作違招長轂於河畔飲冀馬乎江湄頓雲網
而潛泳揮神戈而外臨敵罔隆而弗夷逆無微而不禽

茂德韡其既休元勳昭而存舉龍哀服於太階配三台
乎其所以故其生也榮雖萬物咸被其仁其亡也哀雖
天網猶失其綱嬰國命以逝止亮身沒而吳亡

思親賦

悲桑梓之悠曠愧蒸嘗之弗營指南雲以寄歎望歸風
而効誠年歲俄其聿暮明星爛而將清迴飈肅以長赴
零雪紛其下積羨纖枝之在榦悼落葉之去枝存顧復
之遺志感明發之所懷居辭安而厭苦養引約而摧豐

忘天命之晚暮願鞠子之速融兄瓊芳而蕙茂弟蘭發
而玉暉感瑰姿之晚就痛慈景之先違天步悠長人道
短矣異途同歸無早晚矣

別賦

伊公子之可懷悲永別之局期悼同居之無樂曾不踰
乎一晷經春秋之寒暑常戚戚而不怡登九層而修觀
超臨遠以相思

懷土賦

有序

余去家漸久懷土彌篤方思之殷何物不感曲街委巷
罔不興詠水泉草木咸足悲焉故述斯賦

背故都之沃衍適新邑之丘墟遵黃川以葺宇被蒼林
而卜居悼孤生之已晏恨親沒之何速排虛房而永念
想遺塵其如玉眇綿邈而莫覲徒佇立其焉屬感亡景
於存沒惋隕年於拱木悲顧盼而有餘思俯仰而自足
留茲情於江介寄瘁貌於河曲玩通川以悠想撫征轡
而躑躅伊命駕之徒勤慘歸途之良難慙棲鳥於南枝

弔離禽於別山念庭樹以悟懷憶路草以解顏甘堇荼
於飴比締蕭艾其如蘭神何寢而不夢形何興而不
言

思歸賦

有序

余以元康六年冬取急歸而王師外征職典中兵與聞
軍政懼兵革未息宿願有違懷歸之思憤而成篇

節運代序四時相推寒風肅殺白露霑衣嗟行邁之彌
留感時逝而懷悲彼離思之在人恒戚戚而無歡悲緣

情以自誘憂觸物而生端晝輟食而發憤宵假寐而興
言羨歸鴻以矯首挹谷風而如蘭歲靡靡而薄暮心悠
悠而增楚風霏霏而入室響泠泠而愁予既遨遊乎川
汴亦改駕乎山林伊我思之沈鬱愴感物而增深歎隨
風而上逝涕承纓而下尋冀王事之暇豫庶歸寧之有
時候涼風而警策指孟冬而為期願靈暉之促景恒立
表以望之

行思賦

背洛浦之遙遙浮廣川之裔裔遵河曲以悠遠觀通流
之所會啟石門而東縈沿汴渠其如帶託飄風之習習
冒沈雲之藹藹商秋肅其發節玄雲霈而垂陰涼風淒
其薄體零雨鬱鬱而下淫覩川禽之遵渚看山鳥之歸林
揮清波以濯羽翳綠葉而弄音行彌久而情勞途愈近
而思深美品物以獨感悲綢繆而在心嗟逝官之永久
年荏苒而歷茲越河山而託景眇四載而遠期孰歸寧
之弗樂獨抱感而弗怡

感時賦

悲夫冬之為氣亦何惜懍以蕭索天悠悠其彌高霧鬱鬱而四幕夜繚邈其難終日晚晚而易落敷層雲之葳蕤隆零雪之揮霍冰冽冽而寢興風謾謾而妄作鳴枯條之泠泠飛落葉之漠漠山崆嶺以含瘁川蜚蛇而抱洄望八極以矐漭普宇宙而寥廓伊天時之方慘曷萬物之能歡魚微微而求偶獸岳岳而相攢猿長嘯於林杪鳥高鳴於雲端矧余情之含瘁恒覩物而增酸歷四

時之迭感悲此歲之已寒撫傷懷以嗚咽望永路而汎
瀾

歎逝賦

有序

昔每聞長老追計平生同時親故或彫落已盡或僅有
存者余年方四十而懿親戚屬亡多存寡暱交密友亦
不半在或所曾共遊一塗同宴一室十年之內索然已
盡以是思哀哀可知矣乃為賦曰

伊天地之運流紛升降而相襲日望空以駿驅節循虛

而警立嗟人生之短期孰長年之能執時飄忽其不再
老晚晚其將及懟瓊藻之無徵恨朝霞之難挹望暘谷
以企予惜此景之屢戢悲夫川閱水以成川水滔滔而
日度世閱人而為世人冉冉而行暮人何世而弗新世
何人之能故野每春其必華草無朝而遺露經終古而
常然率品物其如素譬日及之在條恒雖盡而不悟雖
不悟而可悲心惆焉而自傷亮造化之若茲吾安取夫
久長痛靈根之夙殞怨具爾之多喪悼堂構之頽瘁慙

城闕之丘荒親彌懿其已逝交何戚而不亡咨余今之
方殆何視天之茫茫傷懷悽其多念蹙貌瘁而鮮歡幽
情發而成緒滯思叩而興端慘此世之無樂詠在昔而
為言居充堂而衍宇行連駕而比軒彌年時其詎幾夫
何往而不殘或冥邈而既盡或寥廓而僅半信松茂而
栢悅嗟芝焚而蕙歎苟性命之弗殊豈同波而異瀾瞻
前軌之既覆知此路之良難啟四體而深悼懼茲形之
將然毒娛情之寡方怨感目之多顏諒多顏之感目神

何適而獲怡尋平生於響像覽前物而懷之步寒林以
悽惻翫春翹而有思觸萬物以生悲歎同節而異時年
彌往而念廣塗薄暮而意近親落落而日稀友靡靡而
愈索顧舊要於遺存得十一於千百樂隕心其如忘哀
緣情而來宅託末契於後生余將老而為客然後弭節
安懷妙思天造精浮神淪忽在世表寤大暮之同寐何
矜晚以怨早指彼日之方除豈茲情之足攪感秋華於
衰木瘁零露於豐草在殷憂而弗違夫何云乎識道

將頤天地之大德遺聖人之洪寶解心累於末迹聊優
游以娛老

愍思賦

某屢抱孔懷之痛而奄復喪同生姊銜恤哀傷一載之
間而喪制便過故作此賦以紓慘惻之感

時方至其修忽歲既去其晝晚樂來日之有繼傷頹年
之莫纂覽萬物以澄念怨伯姊之已遠尋遺塵之思長
瞻日月之何短升降乎階際顧盼兮屏營雲承宇兮藹

諒風入室兮泠泠僕從為我悲孤鳥為我鳴

述思賦

情易感於已攬思難戢於未忘嗟伊思之且爾夫何往
而弗臧駭中心於同氣分戚貌於異方寒鳥悲而饒音
衰林愁而寡色嗟余情之屢傷負大悲之無力苟彼塗
之信險恐此日之行晁亮相見之幾何又離居而別域
觀尺景以傷悲撫寸心而悽惻

大暮賦

有序

夫死生是得失之大者故樂莫甚焉哀莫深焉使死而有知乎安知其不如生如遂無知耶又何生之足戀故極言其哀而終之以達庶以開夫近俗云

夫何天地之遼濶而人生之不可久長日引月而並隕時維歲而俱喪知自壯而得老體自老而得亡顧黃壚之杳杳悲泉路之翳翳挫千乘猶一毫當何數乎智慧徒假願於須臾指夕景而為誓忽呼吸而不振奄神徂而形斃顧萬物而遺恨收百慮而長逝於是六親雲起

姻族如林爭塗淹淚望門舉音敷幄席以悠想陳備物
而虞靈仰寥廓而無見俯寂寞而無聲肴饌饒其不毀
酒湛湛而每盈屯送客於山足伏埏道而哭之局幽戶
以大畢訴玄闕而長辭歸無塗兮往不反年彌去兮逝
彌遠彌遠兮日隔無塗兮曷因庭樹兮葉落墓草兮根
陳

感丘賦

泛輕舟於西川背京室而電飛遵伊洛之坻渚沿黃河

之曲渭觀墟墓於山梁託崇山以自綏見兆域之藹藹
羅酈封之纍纍於是徘徊洛涯弭節河干佇盼留心慨
爾遺歎仰終古以遠念窮萬緒乎其端伊人生之寄世
猶水草乎山河應甄陶以歲改順通川而日過爾乃申
舟人以遂往橫大川而有悲傷年命之倏忽怨天步之
不幾雖履信而思順曾何足以保茲普天壤其弗免寧
吾人之所辭願靈根之晚墜指歲暮而為期

又

生矜節於當世死同宅乎一丘翳形骸以下淪兮漂營
鬼而上浮隨陰陽以融冶託山原以為疇妍媸混而為
一孰云識其所修必眇代以遠覽兮夫何徇乎區陳

列僊賦

夫何列僊玄妙超攝生乎世表因自然以為基仰造化
而聞道性沖虛以易足年緬邈其難老爾乃呼翕九陽
抱一含元引新吐故雲飲露餐違品物以長盼妙羣生
而為言爾其佳會之仇息宴遊棲則昌客弄玉洛宓江

妃觀百化於神區覲天皇於紫微過太華以息駕越流沙而來歸

凌霄賦

挾至道之容微狹流俗之紛沮颺余節以遠模風扶搖而相予削陋跡於分丘省遊僊而投軌凱情累以遂濟豈時俗之云阻判煙雲之騰躍半天步而無旅詠凌霄之飄飄永終焉而弗悔昊蒼煥而運流日月翻其代序下霄房之靡迄卜良晨而復舉陟瑤臺以投轡步玉除

而容與

幽人賦

世有幽人漁釣乎玄渚彈雲冕以辭世披霄褐而延佇
是以物外莫得窺其奧舉世不足揚其波勁秋不能雕
其葉芳春不能發其華超塵冥以絕緒豈世網之能加

應嘉賦有序

友人有作嘉遁賦與余者作賦應之號曰應嘉云

傲世公子體逸懷遐意邈澄霄神夷靜波仰羣軌以遙

企頓駿羽以婆娑寄冲氣於大象解心累於世羅襲三
閭之奇服詠南榮之清歌濯下泉於浚澗泝凱風於卷
阿指千秋以厲響俟寂寞之來和懷前修之彷彿覲幽
人乎所過抱玄景以獨寐含清風而寤語發蘭音以清
唱操玉懷而喻予於是葺宇中陵築室河曲軌絕千途
而門瞻百族假妙道以達觀考貴龜而貞卜苟形骸之
可忘豈投簪其必谷方介丘於尺阜託雲林乎一木佇
鳴條以招風聆哀音其如玉窮覽物以盡齒將弭跡於

餘足

豪士賦有序

夫立德之基有常而建功之路不一何則循心以為量者存乎我因物以成務者繫乎彼存夫我者隆殺止乎其域繫乎物者豐約唯所遭遇落葉俟微風以隕而風之力蓋寡孟嘗遭雍門以泣而琴之感以末何者欲隕之葉無所假烈風將墜之泣不足繁哀響也是故苟時啟於天理盡於民庸夫可以濟聖賢之功斗筭可以定

烈士之業故曰才不半古而功已倍之蓋得之於時勢也歷觀古今徼一時之功而居伊周之位者有矣夫我之自我智士猶嬰其累物之相物昆蟲皆有此情夫以自我之量而挾非常之勲神器暉其顧盼萬物隨其俯仰心玩居常之安耳飽從諛之說豈識乎功在身外任出才表者哉且好榮惡辱有生之所大期忌盈害上鬼神猶且不免人主操其常柄天下服其大節故曰天可讎乎而時有袪服荷戟立乎廟門之下援旗誓衆奮於

阡陌之上況乎代主制命自下裁物者哉廣樹恩不足以敵怨勤興利不足以補害故曰代大匠斲者必傷其手且夫政由甯氏忠臣所為慷慨祭則寡人人主所不久堪是以君爽怏怏不悅公旦之舉高平師師側目傅陸之勢而成王不遣嫌吝於懷宣帝若負芒刺於背非其然者歟嗟乎光于四表德莫富焉王曰叔父親莫昵焉登帝天位功莫厚焉守節沒齒忠莫至焉而傾側顛沛僅而自全則伊生抱明允以嬰戮文子懷忠敬而齒

劍固其所也因斯以言夫以篤聖穆親如彼之懿大德
至忠如此之盛尚不能取信於人主之懷止謗於衆多
之口過此以往惡覩其可安危之理斷可識矣又況乎
饗大名以冒道家之忌運短才而易聖哲所難者哉身
危由於勢過而不知去勢以求安禍積起於寵盛而不
知辭寵以招福見百姓之謀已則申宮警守以崇不畜
之威懼萬民之不服則嚴刑峻制以賈傷心之怨然後
威窮乎震主而怨行乎上下衆心日陟危機將發而方

偃仰瞪眄謂足以夸世笑古人之未工忘已事之已拙
知曩勲之可矜暗成敗之有會是以事窮運盡必於顛
仆風起塵合而禍至常酷也聖人忌功名之過已惡寵
祿之踰量蓋為此也夫惡欲之大端賢愚所共有而游
子徇高位於生前志士思垂名於身後受生之分唯此
而已夫蓋世之業名莫大焉震主之勢位莫盛焉率意
無違欲莫順焉借使伊人頗覽天道知盡不可益盈難
久持超然自引高揖而退則巍巍之盛仰邈前賢洋洋

之風俯冠來籍而大欲不乏於身至樂無愆乎舊節彌
効而德彌廣身愈逸而名愈劭此之不為彼之必昧然
後河海之迹堙為窮流一簣之釁積成山岳名編凶頑
之條身厭荼毒之痛豈不謬哉故聊賦焉庶使百世少
有寤云

世有豪士兮遭國顛沛攝窮運之歸期當衆通之所會
苟時至而理盡譬摧枯而振敗因天地以運動恒才瑣
而功大於是禮極上典服盡暉崇儀北辰以葺宇實蘭

室而桂宮撫玉衡於樞極運萬物乎掌中伊天道之剛
健猶時至而必讐日罔中而弗昃月何盈而不闕襲覆
車之危軌笑前乘之去穴若知險而退止趨歸蕃而自
戢推璇璣以長謝顧萬物而高揖訖浮雲以邁志豈咎
吝之能集擠為山以自隕歎禍至於何及

浮雲賦

有輕虛之艷象無實體之真形厚厥本初浮沈混并六
律籥應八風時邁玄陰觸石甘澤霽霽勢不崇朝覆彼

無外若層臺高觀重樓疊閣或如鐘音之鬱律乍似寒
門之寥廓金柯分玉葉散綠翹明晶英煥鸞翔鳳翥鴻
驚鶴奮鯨鯢汴波鯨鯢衝遁朱絲亂紀羅袿失領飛僊
凌虛隨風游騁有若芙蓉羣披薜華總會車渠繞理瑪
瑙縟文

白雲賦

攄神景於八幽合洪化乎烟煴克宇宙以播象協元氣
而齊勲發憤靈石擢性洪流興曜曾泉升迹融丘盈八

絃以餘憤雖彌天其未泄豈假期於遷晷遇崇朝而倏
忽紅蘂發而茁茁金翹援而含葩神收鬼化弼性違序
鳥殊類而比棲獸異迹而同處蛟引翳而並潛龍攀鴻
而雙舉鸞舞角以軒罷鷺企翮而延佇長城曲蜿采閣
相扶聳瑤臺之巖壁構瓊闥之離婁雄虹矯而垂天翠
鳥軒而扶日

鼓吹賦

原鼓吹之伊始蓋稟命於黃軒播威靈於茲樂亮聖器

而成文騁逸氣而憤壯繞煩手乎曲折舒飄颻以遐洞
卷徘徊其如結及其悲唱流音彷徨依違合歡嚼弄乍
數乍稀音躑躅於唇吻舌將舒而復迴鼓砰砰以輕投
簫嘈嘈而微吟詠悲翁之流思怨高臺之難臨顧穹谷
以含哀仰歸雲而落音節應氣以舒卷響隨風而浮沈
馬頓迹而增鳴士頓蹙而霑襟若乃巡郊澤戲野坰奉
君馬詠南城慘巫山之遐險歡芳樹之可榮

又

宮備衆聲體僚君器飾聲成文彫音作尉響以形分曲
以和綴放嘉樂於會通宣萬變於觸類適清響以定奏
期要妙於豐會邀拊搏之所管務憂歷之為最

漏刻賦

偉聖人之制器妙萬物而為基形罔隆而弗包理何遠
而不之寸管俯而陰陽效其誠尺表仰而日月與之期
元鳥懸而八風以情應玉衡立而天地不能欺既窮神
以盡化又說漏以考時爾乃挈金壺以南羅藏幽水而

北戟擬洪殺於編鍾順卑高而為級激懸泉以遠射跨
飛途而遙集伏陰蟲以承波吞恒流其如挹是故來象
神造去猶鬼幻因勢相引乘靈自薦口納胸吐水無滯
咽形微獨靈之緒逝若垂天之電偕四時以合最指昏
明乎無殿籠八極於千分度晝夜乎一箭抱百刻以駿
浮仰胡人而利見夫其立體也簡而効績也誠其假物
也粗而致用也精積水不過一鍾導流不過一筵而用
天者因其敏分地者賴其平徵聽者假其察貞觀者借

其明考計歷之潛慮測日月之幽情信探賾之妙術雖
無神其若靈

羽扇賦

昔楚襄王會於章臺之上山西與河右諸侯在焉大夫
宋玉唐勒侍皆操白鶴之羽以為扇諸侯掩塵尾而笑
襄王不說宋玉趨而進曰敢問諸侯何笑諸侯曰昔者
武王玄覽造扇於前而五明安衆庶繁於後各有託於
方圓蓋受則於萐莆含茲器而不用顧奚取於鳥羽宋

玉曰夫創始者恒樸而飾終者必妍是故烹飪起於熟
石玉輅基於推輪安衆方而氣散五明圓而風煩未若
茲羽之為麗固體俊而用鮮彼凌霄之偉鳥播鮮輝之
輕葍隱九臯以鳳鳴游芳田而龍見醜靈龜而遠期超
長年而久眄累懷璧於美羽挫千載乎一箭委曲體以
受制奏雙翅而為扇則其布翮也差洪細袂長短稠不
逼稀不簡於是鏤巨獸之齒裁奇木之榦憲靈樸於造
化審貞則而妙觀移圓根於正體因天秩乎舊貫鳥不

能別其是非人莫敢分其真贗翩翩姍姍以微振風飄飄以垂婉妙自然以為言故不積而能散其執手也安其應物也誠其招風也利其播氣也平混貴賤而一節風無往而不清諸侯曰善宋玉遂言曰伊茲羽之駿敏似南箕之啟扉垂皓曜之奕奕含鮮風之微微襄王仰而拊節諸侯伏而引非皆委扇於楚庭執鳥羽而言歸屬唐勒而為之辭曰

伊鮮禽之令羽夫何翩翩與眇眇反寒暑於一掌之末

迴八風乎六翮之杪

桑賦

井序

皇太子便坐蓋本將軍直廬也初世祖武皇帝為中壘將軍植桑一株世更二代年漸三紀扶疏豐衍抑有瑰異焉

夫何佳樹之洪麗超託居乎紫庭羅萬根以下洞矯千條而上征豈民黎之能植乃世武之所營故其形瑰族類體艷衆木黃中爽理滋榮煩縟綠葉興而盈尺崇條

蔓而層尋希太極以延峙映承明而廣臨革飛鶚之流
響想鳴鳥之遺音唯歷數之有紀恒依物以表德豈神
明之所相將我皇之先識誇百世而勿剪超長年以永
植

瓜賦

佳哉瓜之為德邈衆果而莫賢殷中和之淳祐播茲榮
於甫田背芳春以初載迎朱夏而自延奮修系之莫莫
邁秀隄之綿綿赴廣武以長蔓繁煙接以雲連感佳時

而促節蒙惠露而增鮮若乃紛敷雜錯鬱悅婆娑發彼
適此迭相經過熙朗日以熠燿扇和風其如波有葛藟
之覃及相椒聊之衆多發金紫於秀翹結玉實於柔柯
蔽翠景以自育綴修莖而星羅夫其種族類數則有枯
萋定桃黃瓠白搏金文蜜筍小青大班玄鼈素椀狸首
虎蹯東陵出於秦谷桂髓起於巫山五色比象殊形異
端或濟貌以表內或惠心而醜顏或攄文而抱綠或披
素而懷丹氣洪細而俱芬體修短而必圓芳郁烈其充

堂味窮理而不餉德弘濟於飢渴道殷流乎貴賤若夫
濯以寒水淬以夏凌越氣外歛溫液密凝體猶握虛離
若剖冰

鼈賦

有引

皇太子幸於釣臺漁人獻鼈命侍臣作賦

其狀也穹脊運脅元甲四周遁方圓於規矩徒廣狹
以妨舟循盈尺而脚寸又取具於指掌鼻嘗氣而忌
脂耳無聽而受響是以棲居多逼出處寡便尾不副首

足不運身於是從容澤畔肆志汪洋朝戲蘭渚夕息中
塘越高波以燕逸竄洪流而潛藏咀蕙蘭之芳芬翳華
藕之垂房

表

謝平原內史表

陪臣陸機言今月九日魏郡太守遣兼丞張含齎板詔
書印綬假臣為平原內史拜受祇竦莫知所裁臣機頓
首死罪死罪臣本吳人出自敵國世無先臣宣力之效

才非丘園耿介之秀皇澤廣被惠濟無遠擢自羣萃累
蒙榮進入朝九載歷官有六身登三閣宦成兩宮服冕
乘軒仰齒貴遊振景拔迹顧邈同列施重山岳義足灰
沒遭國顛沛無節可紀雖蒙曠蕩臣獨何顏俛首頓膝
憂媿若厲而橫為故齊王冏所見枉陷誣臣與衆人共
作禪文幽執圜圜當為誅始臣之微誠不負天地倉卒
之際慮有逼迫乃與弟雲及散騎侍郎袁瑜中書侍郎
馮罷尚書右丞崔基廷尉正顧榮汝陰太守曹武思所

以獲免陰蒙避迴崎嶇自列片言隻字不關其間事蹤
筆跡皆可推校而一朝翻然更以為罪最爾之生尚不
足去區區本懷實有可悲畏逼天威即罪惟謹鉗口結
舌不敢上訴所天莫大之釁日經聖聽肝血之誠終不
一聞所以臨難慷慨而不能不恨恨者惟此而已重蒙
陛下愷悌之宥回霜收電使不隕越復得扶老携幼生
出獄戶懷金拖紫退就散輩感恩惟咎五情震悼跼天
蹐地若無所容不悟日月之明遂垂曲照雲雨之澤播

及朽瘁忘臣弱才身無足采哀臣零落罪有可察苟削
丹書得夷平民則塵洗天波謗絕衆口臣之始望尚未
至是猥辱大命顯授符虎使春枯之條更與秋蘭垂芳
陸沈之羽復與翔鴻撫翼雖安國免徒起紆青組張敞
亡命坐致朱軒方臣所荷未足為泰豈臣蒙垢含吝所
宜忝竊非臣毀宗夷族所能上報喜懼參并悲慚哽結
拘守常憲當便道之官不得束身犇走稽顙城闕瞻係
天衢馳心輦轂臣不勝屏營延仰謹拜表以聞

薦賀循郭訥表

伏見武康令賀循德量邃茂才鑒清遠服膺道素風操
凝峻歷試二城刑政肅穆前蒸陽令郭訥風度簡曠器
識朗拔通濟敏悟才足幹事循守下縣編名凡悴訥歸
家巷棲遲有年皆出自新邦朝無知己居在遐外志不
自營年時倏忽而邈無階緒實州黨愚智所為恨恨臣
等伏思臺郎所以使州州有人非徒以均分顯路惠及
外州而已誠以庶士殊風四方異俗壅隔之害遠國益

甚至於荆揚二州戶各數十萬今揚州無郎而荊州江南乃無一人為京城職者誠非聖朝待四方之本心至於才望資品循可尚書郎訥可太子洗馬舍人此乃衆望所積非但企及清塗苟克方選也謹條資品乞蒙簡察

吳志顧榮陸機陸雲薦賀循表其後云臣等並以凡才累授飾進被服恩澤忝豫朝末知良士後時而守局無言懼有蔽賢之咎是以不勝愚管謹冒死表聞

見原後謝表

趙王倫以陸士衡為中書侍郎
齊王收士衡付廷尉出後謝表

臣以職在中書制命所出而臣本以筆札見知辭不獲已乃詐發內妹喪出就弟雲哭泣受弔片言隻字文不關其間

薦張暢表

伏見司徒下諫議大夫張暢除當為豫州內史丞暢才思清敏志節貞勵秉心立操早有名譽其年時舊比多歷郡守惟暢陵遲末齒而佐下蕃遂蹈碎濁於暢名實損愚以為宜解舉試以近縣

牒

與趙王倫薦戴淵

蓋聞繁弱登御然後高墉之功顯孤竹在肆然後降神之曲成是以高世之主必假遠邇之器蘊匱之才思託大音之和伏見處士廣陵戴若思年三十清冲履道德量允塞思理足以研幽才鑒足以辯物安窮樂志無風塵之慕砥節立行有井渫之潔誠東南之遺寶宰朝之奇璞也若得託跡康衢則能結軌驥騄曜質廊廟必能

垂光璵璠矣惟明公垂神採察不使忠允之言以人而廢

同前

出虞預晉書與今本稍異今并載之

蓋聞繁弱登御然後高墉之功顯孤竹在肆然後降神之曲成伏見處士戴淵砥節立行有井渫之潔安神樂志無風塵之慕誠東南之遺寶朝廷之貴璞也若得寄跡康衢必能結軌驥騄耀質廊廟必能垂光璵璠夫枯岸之民果於輸珠潤山之客烈於貢玉蓋明暗呈

形則庸識所甄也

至洛與成都王頽牋

王室多故禍難存存有羊玄之乘寵凶豎專記朝政姦臣
賊子是為比周皇甫商同惡相求共為亂階至今天子
飄飄甚於贅旒伏惟明公匡濟之舉義命方宣元戎既
啟風威電赫機以駕閭文武寡施猥蒙橫授委任外
閫輒承嚴教董率諸軍惟力是視

書

與弟雲書

仁壽殿前有大方銅鏡高五尺餘廣三尺二寸立著庭中向之便寫人形體了了亦怪也

又

天淵池南角有果各作一株無處不有縱橫成行一果

之間輒作一堂

又云天淵池養山鷄甚可嬉

又

監徒武庫建始殿諸房中見有兩足猴真怪物也

又聽訟觀

東作百尺
許廊屋

又

此間有一僖父欲作三都賦須其成以覆酒甕耳

七

七徵

玄虛子耽性冲素雍容玄泊棄時俗而弗徇甘漁釣於
一壑乃有通徵大夫怨皇居之失寶傷鴻誓之後聞策
玄黃於榛險憑穴嵒而放言通徵大夫曰奇膳玉食窮

滋致豐簡犧羽族考牲毛宗俯出沉鮪仰落歸鴻剖烝
胎於孕豹宰潛肝乎豢龍拾朝陽之遺卵納丹穴之
飛凰神宰奇稔嘉禾之穗含滋發馨素穎玉銳灼若
皓雪之頰玄雲皎若明珠之積緇匱素蟣踊而澆漓
滋芬溢而相徽味雖濃而弗爽氣既惠而復奇介景福
於眉壽裕溫克乎齊聖子能饗之乎通微大夫曰豐
居華殿奇構磊落萬宇雲覆千楹林錯仰綏瑰木俯
積瑛石敷延袤之廣廡矯凌霄之高閣秀清暉乎雲表

騰藻蔭之奕奕珍觀清榭岳立連行雲階飛陞仰陟
穹蒼聳浮柱而虬立施飛檐以龍翔回房旋室綴珠
襲玉圖畫神仙延祐承福懸闥高達長廊迴屬於是
登漸臺理俊音鏡玄江望長林逐狡獸弋輕禽覽壯藝
以悅觀聆和樂而怡心子能居之乎通微大夫曰金石
諧而齊響埴簴協而和鳴於是才人進羽籥玄弁被
藻襲俯紫領以鴻歸仰矯首而鶴立激長歌於丹唇發
鏗鏘乎柔木合清商以絕節揮流徵而赴曲奏南荆之

高歎詠易水之清角爾乃覩蛾眉之羣麗容既都而又
閑矯纖腰以逐節頓皓足於鼓盤舒妍暉以妖韶若陵
危之未安通微大夫曰蓋聞沫北有采唐之思淇上有
送子之歎關雎以寤寐為戚溱洧以謔浪為歡若夫妖
嬪艷女蒐羣擢俊穆藻儀於令表茂當年之柔嫚罄妍
規之約綽體每變而增閑秀芳蕤其愉愉若餘穎之可
食若夫靈晷潛祖顏退羽觴升清琴厲因清明以宣誠
流徽睇而授愛纖手揮而鳴佩鏗華衿被則芳塵萃子

其納之乎通微大夫曰塗有殊而一致業有殊而名約
各因姿以效績期寄響於天人也孰與顯奇蹤於萬邦
撫六轡而高遊瞰八字以攄眄齊清風乎諸侯言成否
泰氣作溫涼弭侵略於強暴綜墜紀乎危邦子豈不願
斯之雍容乎通微大夫曰明主應期撫民以德配仁風
於黃唐齊威靈乎宸極彞倫章序庶績咸乂盪流風
於雍俗給天民乎齊泰是以玄靈感而表應嘉神繁而
畢覲舞唐庭之來儀鳴岐陽之鸞鷟應天監之休命荷

神聽之介福然聖主達持盈之寶術寤經國之在賢各
畢榮於分局期贊化於大鈞吾子豈不欲縻好爵於天
宇顯列業乎帝臣歟玄虛子作而言曰甚哉鄙人之惑
也猶窮繩自逸於井幹憑河盜本於黃川欽至論敷敝
衽謹聞命於王孫

連珠

演連珠五十首

臣聞日薄星迴穹天所以紀物山盈川冲后地所以播

氣五行錯而致用四時違而成歲是以百官恪居以赴
八音之離明君執契以要克諧之會

臣聞任重於力才盡則困用廣其器應博則凶是以物
勝權而衡殆形過鏡則照窮故明主程才以效業貞臣
底力而辭豐

臣聞髦俊之才世所罕乏丘園之秀因時則揚是以大
人基命不擢才於后土明主聿興不降佐於昊蒼

臣聞世之所遺未為非寶主之所珍不必適治是以俊

又之藪希蒙翹車之招金碧之品必辱鳳舉之使

臣聞祿放於寵非隆家之舉官私於親非興邦之選是以三卿世及東國多衰弊之政五侯並軌西京有陵夷之運

臣聞靈輝朝覲稱物納照時風夕灑程形賦音是以至道之行萬類取足於世大化既洽百姓無匱於心臣聞頓網探淵不能招龍振網羅雲不必招鳳是以巢箕之叟不眇丘園之幣洗渭之民不發傳品之夢

臣聞鑑之積也無厚而照有重淵之深目之察也有畔而眦周天壤之際何則應事以精不以形造物以神不以器是以萬邦凱樂非悅鐘鼓之娛天下歸仁非感玉帛之惠

臣聞積實雖微必動於物崇虛雖廣不能移心是以都人冶容不悅西施之影乘馬班如不輟太山之陰

臣聞應物有方居難則易藏器在身所乏者時是以克堂之芳非幽蘭所難繞梁之音實繁絃所思

臣聞智周通塞不為時窮才經夷險不為世屈是以凌
飈之羽不求反風曜夜之目不思倒日

臣聞忠臣率志不謀其報貞士發憤期在明賢是以柳
莊黜擯非貪瓜衍之賞禽息碎首豈要先茅之田

臣聞利眼臨雲不能垂照朗璞蒙垢不能吐暉是以明
哲之君時有蔽壅之累俊乂之臣屢抱後時之悲

臣聞郁烈之芳出於委灰繁會之音生於絕絃是以貞
女要名於沒世烈士赴節於當年

臣聞良宰謀朝不必借威貞臣衛主修身則足是以三
晉之強屈於齊堂之俎千乘之勢弱於陽門之哭

臣聞赴曲之音洪細入韻蹈節之容俯仰依詠是以言
苟適事精粗可施士苟適道修短可命

臣聞因雲灑潤則芬澤易流乘風載響則音徽自遠是
以德教俟物而濟榮名緣時而顯

臣聞覽影偶質不能解獨指跡慕遠無救於遲是以循
虛器者非應物之具玩空言者非致治之機

臣聞鑽燧吐火以續陽谷之晷揮翮生風而繼飛廉之功是以物有微而毗著事有瑣而助洪

臣聞春風朝煦蕭艾蒙其溫秋霜宵墜芝蕙被其涼是以威以齊物為肅德以普濟為弘

臣聞性之所期貴賤同量理之所極卑高一歸是以准月稟水不能加涼晞日引火不必增輝

臣聞巧盡於器習數則貫道繫於神人亡則滅是以輪匠肆目不乏奚仲之妙瞽史清耳而無伶倫之察

臣聞絕節高唱非凡耳所悲肆義芳訊非庸聽所善是以南荆有寡和之歌東野有不釋之辨

臣聞尋煙染芬薰息猶芳徵音錄響操終則絕何則垂於世者可繼止乎身者難結是以玄晏之風恒存動神之化已滅

臣聞託閭藏形不為巧密倚智隱情不足自匿是以重光發藻尋虛捕景大人貞觀探心昭忒

臣聞披雲看霄則天文清澄風觀水則川流平是以四

族放而唐劬二臣誅而楚寧

臣聞音以比耳為美色以悅目為歡是以衆聽所傾非
假北里之操萬夫婉孌非俟西子之顏故聖人隨世以
擢佐明主因時而命官

臣聞出乎身者非假物所隆牽乎時者非克己所勗是
以利盡萬物不能獻童昏之心德表生民不能救棲遑
之辱

臣聞動循定檢天有可察應無常節身或難照是以望

景揆日盈數可期撫臆論心有時而謬

臣聞傾耳求音眊憂聽苦澄心徇物形逸神勞是以天
殊其數雖同方不能分其感理塞其通則並質不能共
其休

臣聞遯世之士非受匏瓜之性幽居之女非無懷春之
情是以名勝欲故偶影之操矜窮愈達故凌霄之節厲
臣聞聽極於音不慕鈞天之樂身足於蔭不假垂天之
雲是以蒲密之黎遺時雍之世豐沛之士忘桓撥之君

臣聞飛轡西頓則離朱與矇眊收察懸景東秀則夜光與砮砮匿耀是以才換世則俱困功偶時而竝劭

臣聞示應於近遠有可察託驗於顯微或可包是以寸管下僚天地不能以氣欺尺素逆立日月不能以形逃臣聞絃有常音故曲終則改鏡無畜影故觸形則照是以虛已應物必究千變之容挾情適事不觀萬殊之妙臣聞祝敵希聲以諧金石之和輦鼓踈擊以節繁絃之契是以經治必宣其通圖物恒審其會

臣聞目無常音之察耳無照景之神故在乎我者不誅之於已存乎物者不求備於人

臣聞放身而居體逸則安肆口而食屬厭則克是以王鮪登俎不假吞波之魚蘭膏停室不思銜燭之龍

臣聞衝波安流則龍舟不能以漂震風洞發則夏屋有時而傾何則牽乎動則靜凝係乎靜則動貞是以淫風大行貞女蒙冶容之誨淳化殷流盜跖挾曾史之情

臣聞達之所服貴有或遺窮之所接賤而必尋是以江

漢之君悲其墜屨少原之婦哭其亡簪

臣聞觸非其類雖疾不應感以其方雖微則順是以商飈漂山不興盈尺之雲谷風垂條必降彌天之潤故閭於治者唱繁而和寡審乎物者力約而功峻

臣聞煙出於火非火之和情生於性非性之適故火壯則煙微性克則情約是以殷墟有感物之悲周京無佇立之跡

臣聞適物之技俯仰異用應事之器通塞異任是以鳥

棲雲而繳飛魚藏淵而網沉賁鼓密而含響朗笛疎而吐音

臣聞理之所守勢所常奪道之所閉權所必開是以生重於利故據圖無揮劍之痛義重於身故臨川有投迹之哀

臣聞圖形於影未盡纖麗之容察火於灰不睹洪赫之烈是以問道存乎其人觀物必造其質

臣聞通於變者用約而利博明其要者器淺而應玄是

以天地之賾該於六位萬殊之曲窮於五絃

臣聞情見於物雖遠猶踈神藏於形雖近則密是以儀
天步晷而修短可量臨淵揆水而淺深難察

臣聞虛暑熏天不減堅冰之寒涸陰凝地無累陵火之
熱是以吞縱之強不能反蹈海之志漂鹵之威不能降
西山之節

臣聞理之所開力所常達數之所塞威有必窮是以烈
火流金不能焚景沉寒凝海不能結風

臣聞足於性者天損不能入貞於期者時累不能淫是以迅風陵雨不謬晨禽之察勁陰殺節不凋寒木之心
論

五等諸侯論

夫體國經野先王所慎創制垂基思隆後葉然而經畧不同長世異術五等之制始於黃唐郡縣之治創自秦漢得失成敗備在典謨是以其詳可得而言夫先王知帝業至重天下至曠曠不可以偏制重不可以獨任任

重必於借力制曠終乎因人故設官分職所以輕其任也並建五長所以弘其制也於是乎立其封疆之典裁其親疎之宜使萬國相維以成磐石之固宗庶雜居而定維城之業又有以見綏世之長御識人情之大方知其為人不如厚己利物不如圖身安上在乎悅下為己在乎利人故易曰悅以使民民忘其勞孫卿曰不利而利之不如利而後利之之利也是以分天下以厚樂而已得與之同憂饗天下以豐利而我得與之共害利博

則恩篤樂遠則憂深故諸侯享食土之實萬國受世及之祚矣夫然則南面之君各務其治九服之民知有定主上之子愛於是乎生下之體信於是乎結世治足以敦風道衰足以禦暴故強毅之國不能擅一時之勢雄俊之士無所寄霸王之志然後國安由萬邦之思治主尊賴羣后之圖身譬猶衆目營方則天網自昶四體辭難而心膂獲又三代所以直道四王所以隆業也夫盛衰隆敝理所固有教之廢興繫乎其人愿法期乎必涼

明道有時而闇故世及之制敝於強禦厚下之典漏於
末折侵弱之釁遘自三季陵夷之禍終於七雄昔者成
湯親照夏后之鑒公旦目涉商人之戒文質相濟損益
有物故五等之禮不革於時封畛之制有隆焉爾者豈
玩二王之禍而闇經世之算乎固知百世非可懸御善
制不能無敝而侵弱之辱愈於殄祀土崩之困痛於陵
夷也是以經始權其多福慮終取其少禍非謂侯伯無
可亂之符郡縣非致治之具也故國憂賴其釋位主弱

憑其翼戴及承微積敝王室遂卑猶保名位祚垂後嗣
皇統幽而不輟神器否而必存者豈非事勢使之然歟
降及亾秦棄道任術懲周之失自矜其得尋斧始於所
庇制國昧於弱下國慶獨饗其利主憂莫與共害雖速
亾趨亂不必一道顛沛之釁實由孤立是蓋思五等之
小怨忘萬國之大德知陵夷之可患閭土崩之為痛也
周之不競有自來矣國乏令主十有餘世然片言勤王
諸侯必應一朝振矜遠國先叛故強晉收其請隧之圖

暴楚頓其觀鼎之志豈劉項之能闕關勝廣之敢號澤
哉借使秦人因循周制雖則無道有與共弊覆滅之禍
豈在曩日漢矯秦枉大啟侯王境土踰溢不遵舊典故
賈生憂其危晁錯痛其亂是以諸侯阻其國家之富憑
其士民之力勢足者反疾土狹者逆遲六臣犯其弱綱
七子衝其漏網皇祖夷於黠徒西京病於東帝是蓋過
正之災而非建侯之累也然呂氏之難朝士外顧宋昌
策漢必稱諸侯逮至中葉忌其失節割削宗子有名無

實天下曠然復襲亡秦之軌矣是以五侯作威不忌萬
邦新都襲漢易於拾遺也光武中興纂隆皇統而猶遵
覆車之遺轍養喪家之宿疾僅及數世姦宄充斥卒有
強臣專朝則天下風靡一夫縱橫則城池自夷豈不危
哉在周之衰難興王室放命者七臣干位者三子嗣王
委其九鼎凶族據其天邑鉦鼙震於閭宇鋒鏑流乎絳
闕然禍止畿甸害不覃及天下晏然以治待亂是以宣
王興於共和襄惠振於晉鄭豈若二漢階閭蹙擾而四

海已沸孽臣朝入而九服夕亂哉遠惟王莽篡逆之事
近覽董卓擅權之際億兆悼心愚智同痛然周以之存
漢以之亡夫何故哉豈世乏曩時之臣士無匡合之志
與蓋遠績屈於時異雄心挫於卑勢爾故烈士扼腕終
委寇讐之手中人變節以助虐國之桀雖復時有鳩合
同志以謀王室然上非奧主下皆市人師旅無先定之
班君臣無相保之志是以義兵雲合無救刼殺之禍民
望未改而已見大漢之滅矣或以諸侯世位不必常全

昏主暴君有時比跡故五等所以多亂今之牧守皆以
官方庸能雖或失之其得固多故郡縣易以為治夫德
之休明黜陟日用長率連屬咸述其職而淫昏之君無
所容過何則其不治哉故先代有以興之矣苟或衰陵
百度自恃鬻官之吏以貨準才則貪殘之萌皆如羣后
也安在其不亂哉故後王有以之廢矣且要而言之五
等之君為已思治郡縣之長為利圖物何以徵之蓋企
及進取仕子之常志修已安民良士之所希及夫進取

之情銳而安民之譽遲是故侵百姓以利己者在位所
不憚捐實事以養名者官長所夙夜也君無卒歲之圖
臣挾一時之志五等則不然知國為己土衆皆吾民民
安已受其利國傷家嬰其病故前人欲以垂後後嗣思
其堂構為上無苟且之心羣下知膠固之義使其竝賢
居治則功有厚薄兩愚處亂則過有深淺然則八代之
制幾可以一理貫秦漢之典殆可以一言蔽矣

辨亡論上

昔漢氏失御姦臣竊命禍基京畿毒遍宇內皇綱弛紊
王室遂卑於是羣雄蜂駭義兵四合吳武烈皇帝慷慨
下國電發荆南權畧紛紜忠勇伯世威稜則夷羿震盪
兵交則醜虜授馘遂掃清宗祊蒸禋皇祖於是雲興之
將帶州飈起之師跨邑哮囁之羣風驅熊羆之衆霧集
雖兵以義合同盟戮力然皆包藏禍心阻兵怙亂或師
無謀律喪威稔寇忠規武節未有如此其著者也武烈
既沒長沙桓王逸才命世弱冠秀發招攬遺老與之述

業神兵東驅奮寡犯衆攻無堅城之將戰無交鋒之虜
誅叛柔服而江外底定飭法脩師則威德翕赫賓禮名
賢而張昭為之雄交御豪俊而周瑜為之傑彼二君子
皆弘敏而多奇雅達而聰哲故同方者以類附等契者
以氣集而江東蓋多士矣將北伐諸華誅鉏耰紀旋皇
輿於夷庚反帝座乎紫闥挾天子以令諸侯清天步而
歸舊物戎車既次羣凶側目大業未就中世而殞用集
我大皇帝以奇蹤襲於逸軌睿心因於令圖從政資於

故實播憲稽乎遺風而加之以篤固申之以節儉疇咨
俊茂好謀善斷束帛旅於丘園旌命交於塗巷故豪彥
尋聲而響臻志士希光而景驚異人輻輳猛士如林於
是張昭為師傅周瑜陸公魯肅呂蒙之疇入為腹心出
作股肱甘寧凌統程普賀齊朱桓朱然之徒奮其威韓
當潘璋黃蓋蔣欽周泰之屬宣其力風雅則諸葛瑾張
承步騭以聲名光國政事則顧雍潘濬呂範呂岱以器
任幹職奇偉則虞翻陸績張溫張惇以風議舉正奉使

則趙咨沈珩以敏達延譽術數則吳範趙達以機祥協
德董襲陳武殺身以衛主駱統劉基強諫以補過謀無
遺諤舉不失策故遂割據山川跨制荆吳而與天下爭
衡矣魏氏嘗藉戰勝之威率百萬之師浮鄧塞之舟下
漢陰之衆羽楫萬計龍躍順流銳騎千旅虎步原隰謨
臣盈室武將連衡喟然有吞江許之志一宇宙之氣而
周瑜驅我偏師黜之赤壁喪旗亂轍僅而獲免收跡遠
遁漢王亦憑帝室之號帥巴漢之民乘危騁變結壘千

里志報關羽之敗圖收湘西之地而我陸公亦挫之西
陵覆師敗績困而後濟絕命永安續以濡須之寇臨川
摧銳逢龍之戰子輪不反由是二邦之將喪氣挫鋒勢
斂財匱而吳莞然坐乘其弊故魏人請好漢氏乞盟遂
躋天號鼎峙而立西屠庸益之郊北裂淮漢之溪東包
百越之地南括羣蠻之表於是講八代之禮蒐三王之
樂告類上帝拱揖羣后虎臣毅卒循江而守長棘勁鏃
望颺而奮庶尹盡規於上四民展業於下化協殊裔風

衍遐圻乃俾一介行人撫巡外域巨象逸駿擾於外閑
明珠瑋寶耀於內府珍瑰重跡而至奇玩應響而赴輜
軒騁於南荒衝輞息於朔野齊民免干戈之患戎馬無
晨服之虞而帝業固矣大皇既沒幼主泣朝姦回肆虐
景皇聿興虔脩遺憲政無大闕守文之良主也降及歸
命之初典刑未滅故老猶存大司馬陸公以文武熙朝
左丞相陸凱以謇諤盡規而施績范慎以威重顯丁奉
離斐以武毅稱孟宗丁固之徒為公卿樓玄賀邵之屬

掌機事元首雖病股肱猶存爰及末葉羣公既喪然後
黔首有瓦解之患皇家有土崩之釁厯命應化而微王
師躡運而發卒散于陣民犇於邑城池無藩籬之固山
川無溝阜之勢非有公輸雲梯之械智伯灌激之害楚
子築室之圍燕人濟西之隊軍未浹辰而社稷夷矣雖
忠臣孤憤烈士死節將奚救哉夫曹劉之將非一世所
選向時之師無曩日之衆戰守之道抑有前符險阻之
利俄然未改而成敗貿理古今詭趣何哉彼此之化殊

授任之才異也

辨亡論下

昔三方之王也魏人據中夏漢氏有岷益吳制荆揚而
奄有交廣曹氏雖功濟諸華虐亦深矣其民怨矣劉公
因險以飾智功已薄矣其俗陋矣夫吳桓王基之以武
太祖成之以德聰明叡達懿度弘遠矣其求賢如不及
恤民如稚子接士盡盛德之容親仁罄丹府之愛拔呂
蒙於戎行識潘濬於係虜推誠信士不恤人之我欺量

能授器不患權之我偏執鞭鞠躬以重陸公之威悉委
武衛以濟周瑜之師卑宮菲食以豐功臣之賞披懷虛
己以納謨士之算故魯肅一面而自託士燮蒙險而致
命高張公之德而省游田之娛賢諸葛之言而割情欲
之歡感陸公之規而除刑法之煩奇劉基之議而作三
爵之誓屏氣跼蹐以伺子明之疾分滋損甘以育凌統
之孤登壇慷慨歸魯子之功削投惡言信子瑜之節是
以忠臣競盡其謨志士咸得肆力洪規遠畧固不厭夫

區區者也故百官苟合庶務未遑初都建業羣臣請備
禮秩天子辭而不許曰天下其謂朕何宮室輿服蓋慊
如也爰及中葉天人之分既定百度之缺粗脩雖醲化
懿綱未齒乎上代抑其體國經民之具亦足以為政矣
地方幾萬里帶甲將百萬其野沃其兵練其器利其財
豐東負滄海西阻險塞長江制其區宇峻山帶其封域
國家之利未巨有弘於茲者矣借使中才守之以道善
人御之有術敦率遺典勤民謹政循定策守常險則可

以長世永年未有危亡之患也或曰吳蜀唇齒之國也
蜀滅吳亡理則然矣夫蜀蓋藩援之與國而非吳人之
存亡也何則其郊境之接重山積險陸無長轂之徑川
阨流迅水有驚波之艱雖有銳師百萬啟行不過千夫
舳艫千里前驅不過百艦故劉氏之伐陸公喻之長蛇
其勢然也昔蜀之初亡朝臣異謀或欲積石以險其流
或欲機械以禦其變天子總羣議而諮之大司馬陸公
公以四瀆天地之所以節宣其氣固無可遏之理而機

械則彼我之所共彼若棄長技以就所屈即荆揚而爭
舟楫之用是天贊我也將謹守峽口以待擒耳逮步聞
之亂憑寶城以延強寇重資幣以誘羣蠻于時大邦之
衆雲翔電發懸旂江介築壘遵渚襟帶要害以止吳人
之西而巴漢舟師沿江東下陸公以偏師三萬北據東
坑深溝高壘案甲養威反虜蹤跡待戮而不敢北窺生
路強寇敗績宵遁喪師大半分命銳師五千西禦水軍
東西同捷獻俘萬計信哉賢人之謀豈欺我哉自是烽

燧罕警封域寡虞陸公沒而潛謀兆吳釁深而六師駭
夫太康之後衆未盛乎曩日之師廣州之亂禍有愈乎
向時之難而邦家顛覆宗廟為墟嗚呼人之云亡邦國
殄瘁不其然歟易曰湯武革命順乎天立曰亂不極則
治不形言帝王之因天時也古人有言曰天時不如地
利易曰王侯設險以守其國言為國之恃險也又曰地
利不如人和在德不在險言守險之由人也吳之興也
參而由焉孫卿所謂合其參者也及其亡也恃險而已

又孫卿所謂捨其參者也夫四州之萌非無衆也大江之南非乏俊也山川之險易守也勁利之器易用也先政之策易循也功不興而禍邁者何哉所以用之者失也是故先王達經國之長規審存亡之至數謙己以安百姓敦厚以致人和寬冲以誘俊又之謀慈和以結士民之愛是以其安也則黎元與之同慶及其危也則兆庶與之共患安與衆同慶則其危不可得也危與下共患則其難不足恤也夫然故能保其社稷而固其土宇

麥秀無悲殷之思黍離無愍周之感矣

議

大田議

臣聞隆古之主不改法而下治陵夷之世不易術而民
怠夫商人逸而利厚農人勞而報薄導農以利則耕夫
勤節商以法則游子歸

頌

漢高祖功臣頌

相國鄴文終侯沛蕭何相國平陽懿侯沛曹參太子少
傅留文成侯韓張良丞相曲逆獻侯陽武陳平楚王淮
陰韓信梁王昌彭越淮南王六黠布趙景王大梁張耳
韓王韓信燕王豐盧綰長沙文王吳芮荆王沛劉賈太
傅安國懿侯王陵左丞相絳武侯沛周勃相國舞陽侯
沛樊噲右丞相曲周景侯高陽酈商太僕汝陰文侯沛
夏侯嬰丞相潁陰懿侯睢陽灌嬰代丞相陽陵景侯魏
傅寬車騎將軍信武肅侯靳歙大行廣野君高陽酈食

其中郎建信侯齊劉敬太中大夫楚陸賈太子太傅襍
嗣君薛叔孫通魏無知護軍中尉隨何新成三老董公
轅生將軍紀信御史大夫沛周苛平國君侯公右三十
一人與定天下安社稷者也頌曰

茫茫宇宙上塲下黷波振四海塵飛五岳九服徘徊三
靈改卜赫矣高祖肇載天祿沈跡中鄉飛名帝錄慶雲
應輝皇階授木龍興泗濱虎嘯豐谷彤雲晝聚素靈夜
哭金精仍頽朱光以渥萬邦宅心駿民效足堂堂蕭公

王跡是因綢繆敵后無競惟人外濟六師內撫三秦拔
奇夷難邁德振民體國垂制上穆下親名蓋羣后是謂
宗臣平陽樂道在變則通爰玄爰默有此武功長驅河
朔電擊壤東協策淮陰亞跡蕭公文成作師通幽洞冥
永言配命因心則靈窮神觀化望影揣情鬼無隱謀物
無遁形武關是闢鴻門是寧隨難榮陽即謀下邑銷印
碁廢推齊勸立運籌固陵定策東襲三王從風五侯允
集霸楚實喪皇漢凱入怡顏高覽弭翼鳳戢託跡黃老

辭世却粒曲逆宏達好謀能深游精杳漠神跡是尋重
玄匪奧九地匪沈伐謀先兆擠響於音奇謀六奮嘉慮
四迴規主以足離項於懷格人乃謝楚翼寔摧韓王寯
執胡馬洞開迎文以謀哭高以哀灼灼淮陰靈武冠世
策出無方思入神契奮臂雲興騰跡虎噬凌險必夷摧
堅則脆肇謀漢濱還定渭表京索既扼引師北討濟河
夷魏登山滅趙威亮火烈勢踰風掃拾代如遺偃齊猶
草二州肅清四邦咸舉乃眷北燕遂表東海克滅龍且

爰取其旅劉項懸命人謀是與念功惟德辭通絕楚彭
越觀時弢跡匿光民具爾瞻翼爾膺揚威凌楚域質委
漢王靖難河濟即宮舊梁烈烈黥布耽耽其眚名冠強
楚鋒猶駭電覩幾蟬蛻悟主革面肇彼梟風翻為我扇
天命方輯王在東夏矯矯三雄至於垓下元凶既夷寵
祿來假保大全祚非德孰可謀之不臧舍福取禍張耳
之賢有聲梁魏士也罔極自貽伊媿俯思舊恩仰察五
緯脫跡違難披榛來洎改策西秦報辱北冀悴葉更輝

枯條以肄王信韓孽宅土開疆我圖爾才越遷晉陽盧
綰自微婉孌我皇跨功踰德祚爾輝章人之貪禍寧為
亂亡吳芮之王祚由梅鋞功微勢弱世載忠賢肅肅荆
王董我三軍我圖四方殷薦其勛庸親作勞舊楚是分
往踐厥宇大啟淮瀆安國違親悠悠我思依依哲母既
明且慈引身伏劍永言固之淑人君子寔邦之基義形
於色憤發於辭主亡與亡末命是期絳侯質木多略寡
言曾是忠勇惟帝攸歎雲騫靈丘景逸上蘭平代禽豨

奄有燕韓寧亂以武斃呂以權滌穢紫宮徵帝太原實
惟太尉劉宗以安挾功震主自古所難勲耀上代身終
下藩舞陽道迎延帝幽藪宣力王室匪惟厥武總於鴻
門披闥帝宇聳顏誚項掩淚寤主曲周之進於其哲兄
俾率爾徒從王於征振威龍蛻攄武庸城六師寔因克
荼禽黥猗歟汝陰綽綽有裕戎軒肇跡荷策來附馬煩
轡殆不釋擁樹皇儲時又平城有謀潁陰銳敏屢為軍
鋒奮戈東城禽項定功乘風藉響高步長江收吳引淮

光啟於東陽陵之勛元帥是承信武薄伐揚節江陵夷
王殄國俾亂作懲恢恢廣野誕節令圖進謁嘉謀退守
名都東規白馬北距飛狐即倉敖庾據險三塗輜軒東
踐漢風載徂身死於齊非說之辜我皇實念言祚爾孤
建信委輅被褐獻寶指明周漢銓時論道移帝伊洛定
都豐鎬柔遠鎮邇寔攸攸考抑抑陸生知言之貫往制
勁越來訪皇漢附會平勃夷凶翦亂所謂伊人邦家之
彥百王之極舊草靡存漢德雖朗朝議則昏稷嗣制禮

下肅上尊穆穆帝典煥其盈門風晞三代憲流後昆無
知叡敏獨昭奇跡察侔蕭相貺同師錫隨何辯達因資
於敵紓漢披楚維生之績皤皤董叟謀我平陰三軍縞
素天下歸心袁生秀朗沈心善照漢旆南振楚威自撓
大略淵回元功響效邈哉惟人何識之妙紀信誑項軫
軒是乘攝齋赴節用死孰懲身與煙消名與風興周苛
慷慨心若懷冰形可以暴志不可凌貞軌偕沒亮跡雙
升帝疇爾庸後嗣是膺天地雖順王心有違懷親望楚

永言長悲侯公伏軾皇媼來歸是謂平國寵命有輝震
風過物清濁效響大人於興利在攸往弘海者川崇山
惟壤韶濩錯音袞龍比象明明衆哲同濟天網劍宣其
利鑒獻其朗文武四充漢祚克廣悠悠遐風千載是仰
贊

孔子贊

孔子叡聖配天弘道風扇玄流思探神寶明發懷周興
言謨老靈魄有行言觀蒼昊清歌先誠丹書有造

王子喬贊

遺形靈岳顧景忘歸乘雲倏忽飄飄紫微

箴

丞相箴

夫導民在簡為政以仁仁實生愛簡亦易遵網疏下睦
禁密巧繁深文碎教伊何能存故人不可以不審任不
可以不忠捨賢昵諂則喪爾邦且偏見則昧專聽悔疑
耳目之用亦各有期夫豈不察而帷牆隔之矜已任智



是蔽是欺德無遠而不復惡可適而不追存亡日鑒成敗代陳人咸知鏡其貌而不知照其身

策文

策秀才文

昔三代明王啟建洪業文質殊制而令名一致然夏人尚忠忠之弊也朴救朴莫若敬殷人革而脩焉敬之弊也鬼救鬼莫若文周人矯而變焉文之弊也薄救薄則又反之於忠然則王道之反覆其無一定邪亦所祖之

不同而功業各異也自無聖王人散久矣三代之損益
百姓之變遷其故可得而聞邪今將反古以救其弊明
風以蕩其穢三代之制將何所從太古之化有何異道

又

又問在昔哲王象事備物明堂所以崇上帝清廟所以
寧祖考辟雍所以班禮教太學所以講藝文此盖有國
之盛典為邦之大司亡秦廢學制度荒闕諸儒之論損
益異物漢氏遺作居為異事而蔡邕月令謂之一物將

何所從

又

又問庶明亮采故時雍穆唐有命既集而多士隆周故
書稱明良之歌易貴金蘭之美此長世所以廢興有邦
所以崇替夫成功之君勤於求才立名之士急於招世
理無世不對而事千載恒背古之興王何道而如彼後
之衰世何闕而如此

又

又問昔唐虞垂五刑之教周公明四罪之制故世歎清
問而時歌緝熙姦宄既殷法物滋有叔世崇三辟之文
暴秦加族誅之律淫刑淪胥虐濫已甚漢魏遵承因而
弗革亦由險泰不同而救世異術不得已而用之故也
寬尅之中將何立而可族誅之律足為永制與不

又

又問曰夫五行迭代陰陽相須二儀所以陶育四時所
以化生易稱在天成象在地成形形象之作相須之道

也若陰陽不調則大數不得不否一氣偏廢則萬物不得獨成此應同之至驗不偏之明證也今有溫泉而無寒火其故何也思聞辨之以釋不同之理

又

又問曰夫窮神知化才之盡稱備物致用功之極目以之為政則黃羲之規可踵以之革亂則玄古之風可紹然而唐虞密皇人之濶網夏殷繁帝者之約法機心起而日進淳德往而莫返豈太樸一離理不可振將聖人

之道稍有降殺邪

傳

顧譚傳

宣太子正位東宮天子方隆訓導之義妙簡俊彥講學
左右時四方之傑畢集太傅諸葛恪等雄奇蓋衆而譚
以清識絕倫獨見推重自太尉范慎謝景羊徽之徒皆
以秀稱其名而悉在譚下

碑

晉平西將軍孝侯周處碑

君諱處字子隱義興陽羨人也氏胄曩興煥乎墳典華
宗往茂鬱其簡書啟三十之洪基源流定鼎運八百之
遠祚枝葉封桐軒蓋列於漢庭蟬冕播於陽羨二南之
價傳不朽而紛敷大護之音聲無微而必顯山高海濶
其在斯焉祖賓少折節早亡吳初召諮議參軍舉郡上
計轉為州辟從事別駕步兵校尉光祿大夫廣平太守
父鮐少好學舉孝廉吳寧國長奮威長史懷安錢塘縣

侯丹陽西部屬國都尉立節按尉拜裨將軍三部都督
大中大夫臨川豫章鄱陽太守君晉故散騎常侍新平
廣漢二郡太守封關內侯簪紱揚名臺閣標著風化之
美奏最為能亭亭孤美灼灼橫劭狗高位於生前思垂
名於身後遂以罕言不違應期出輔洋洋之風俯冠來
葉巍巍之盛仰繼前賢君初早孤不弘禮制年未弱冠
膂力絕於天下妙氣挺於人間騎獵無疇時英式慕縱
情寡偶俗弊不忻鄉曲誣其害名改節播其聲譽遂來

吳事余厥弟謹然受誨向道朝聞方勵志而淫詩書便
好學而尋子史文章綺合藻思羅開吳朝州縣交辟太
子洗馬東觀左丞中書右丞五官郎中左右國史靖恭
夙夜恪居官次遷尚書僕射東觀令太常卿無難督匡
熙庶績朝廷謐寧使持節大都督塗中京下諸軍事封
章浦亭侯國猶多士君實得賢汪洋延闕之傍昂藏寮
家之上射獸功猶見顯刺蛟名乃遠揚忠烈道自克脩
義節情還永布琳瑯梓杞珪璧棟梁君著默語三十篇

及風土記并撰吳書於是吳平入晉王渾登建業宮醢
酒既酣因謂君曰諸人亡國之餘得無戚乎君對曰漢
末分崩三方鼎立魏滅於前吳亡於後亡國之戚豈惟
一人渾乃大慙仕晉稍遷總統初入拜諮議郎除討虜
護軍新平太守撫和戎狄叛羗歸附雍土美之轉為廣
漢太守郡多滯訟有經三十年不決者處立評其枉直
一朝決遣以母年老罷歸尋除楚內史未之官徵散騎
常侍處曰古人辭大不辭小乃先之楚而郡既經喪亂

新舊雜居風俗未一處敦以教義又撿尸無主及白骨
在野收而葬之然後就徵遠近稱歎及居近侍多所規
諷遷御史中丞正繩直筆凡所糾劾不避寵戚梁王彤
違法處深文案之及氏人齊萬年反朝臣惡其強直皆
曰處吳之名將子也忠烈果毅庶僚振肅英情天逸遠
性霞騫陝北留棠遂有二天之詠荆南渡虎猶標十部
之書尋轉散騎常侍輕車將軍迴輪出於新平士女揮
淚褰帷望於廣漢雞犬靡喧振茲威略宣其惠和晉京

遙仰部從迎欽是時氐賊作逆有衆七萬屯於梁山朝
廷推賢以君才兼文武詔授建威將軍以五千兵奉辭
西討忠槩盡節不顧身命乃賦詩曰去去世事已策馬
觀西戎藜藿甘梁黍期之克令終言畢而戰自旦及暮
斬首萬級弦絕矢盡番系不救左右勸退處按劍怒曰
此是吾效節授命之日何以退為大臣以身殉國不亦
可乎韓信背水之軍未遑得喻工輸縈帶之勢早擬連
蹤莫不梯山架壑襁負來歸戎士杆其封疆農人展其

耕織秋風才起追戰勇於雷霆春水方生揮錘同於雲
雨立功立事名將名臣者乎元康九年舊疾增加奄捐
館舍春秋六十有二天子以大臣之葬師傳之禮親臨
殯壤建武元年冬十一月甲子追贈平西將軍封清流
亭侯謚曰孝禮也賜錢百萬葬地一頃京城地五十畝
為第又賜王家田五頃詔曰處母年老加以逆旅遠人
朕每憫念給其醫藥酒米賜以終年以太興二年歲在
己卯正月十日葬於義興舊原南瞻荆岳崇峻極之巍

我北睇蛟川濬清流之澄澈娶同郡盛氏有四子靖玘
札碩並皆志性純孝過禮喪親墳前之樹染淚先枯庭
際之禽聞悲乃下遂作銘曰

周南著美岐山表靈葉繁漢室枝茂晉庭皎皎夫子奇
特播名幼有異行世存風烈早馳聞望晚懷耿節頗尚
英雄昇名楚闔捨爵策勲允歸明哲輝赫大晉封豕多
故式揚廟畧克清天步海濱既折江淮並沂漢水作藩
條章斯布俗歌揆日人謠何暮忠貞作相追蹤絳侯將

亭嘉茂據掩芳猷潛光陽甸返旆吳丘舊闕雖入鄉路
冥浮從榮制墓終非畫遊春墟以綠清淮自流深沈素
幪繚繞朱旒玄堂寂寂黃泉悠悠書方易折家揭難留
鐫茲幽石萬代千秋此碑據舊集抄之中多訛謬文理不接且孝侯既戰沒而云舊疾增加奄捐館舍尤可笑也考常州志此碑尚藏於廟而所載亦是如此當是古碑殘滅後人取斷簡以意補湊之用勒于石遂沿以為真耳尚須博考

誄

吳大帝誄

我皇明明固天寔生體和二合以察三精濯暉育慶懷
祥載榮率性而和因心則靈厥靈伊何克聖克仁茂對
四象克配乾坤齊明日月考詳鬼神誕自幼冲獻哲宿
照甄化無形探景絕曜巍巍聖姿文武既俊有覺德徽
兆民欣順將熙景命經營九圍登跡岱宗班瑞舊圻上
玄匪惠早零聖暉神廬既考史臣獻貞龍輶啟殯霄載
紫庭辰旒飛藻凶旗舉銘崇華熠爍翠蓋繁纓千乘結
駟萬騎重營簫鼓振響和鸞流聲動軫閭闔永背承明

顯步萬官幽驅百靈隨化太素即宮杳冥億兆同慕泣
血如零

愍懷太子誄

明明皇子成命既駿保乂皇家載生淑胤茂德克廣仁
姿朗雋當克無疆光紹有晉如何不弔暴離咎艱曾是
邁愍匪降自天肇傾運祚遂喪華年嗚呼哀哉沉雲既
祛日月增暉靈寵可賙冤魂難追舊物東反靈柩西歸
傷我惠后寂焉翳滅銜哀駿奔凶服就列追慕徽塵興

言斷絕敢誅遺風庶存芳烈其辭曰

巍巍皇基奕奕紫微有命既集天祿永綏篤生太子纂
德承茂平紹大烈時惟洪胄奇穎發翹清藻在秀誕自
幼蒙逮事武皇展矣太子播此瓊芳允矣聖祖無言不
臧婉孌乘輿名裕德昌龍集庚戌日月改度赫赫明明
我皇登祚厥登伊何皇統是荷華綬重采翠蓋垂葩鸞
旗阿那玉衡吐和聿來在宮體亮而誠肅雍皇極思媚
紫庭亦既涉學遵師盛道何年之妙而察之早讜言必

復乖義則考惟天有命太子膺之惟皇有慶太子承之

當究遐年登茲胡考緝熙有晉克構帝宇如何晨牝穢
我朝聽仰索皇家惟塵明聖惴惴太子終溫且敬銜辭
卽罪掩淚祇命顯加放流潛肆鳩毒痛矣太子乃離斯
酷謂天蓋高訴哀靡告鞠躬引分顧景摧剝嗚呼哀哉
凡民之喪有戚有姻太子之歿旁無昵親跼蹐嚴宮絕
命禁闈幽樞偏寄孤魂曷歸嗚呼太子生寃歿悲匹夫
有怨尚或殞霜矧乃太子萬邦攸望普天扼腕率土懷

傷精感六沴咎徵紫房爰茲元輔啟我令圖王赫斯怒
天誅靡逋攬搶叱掃元凶服辜仁詔引咎哀策東徂光
復寵祚紹建藐孤於時暉服粲焉畢陳庭旅舊物堂有
故臣孰云太子不見其人嗚呼哀哉既濟洛川靈旆左
迴三軍悽裂都邑如隕慨矣寤歎念我愍懷

吳大司馬陸公誄

我公承軌高風肅邁明德繼體徽音奕世昭德伊何
克俊克仁德周能事體合機神禮交徒候敬睦白屋

蹶踏曲躬吐食揮沐爰及鰥寡賑此惇獨孚厥惠和脫
驂分祿乃命我公誕作元輔位表百辟名茂群后因是
荆人造我寧宇備物典策玉冠及斧龍旂飛藻靈鼓樹
羽質文殊塗百行異轍人玩其華鮮識其實於穆我公
因心則哲經綸至道終始是結德與行滿美與言溢

吳貞獻處士陸君誄

我聞有命天祿有秩如斯古人而有斯疾兄弟之恩離
形合氣矧我與君年相亞逮綢繆之遊自矇及朗孩不

貳音抱或同襁撫髻並育攜手相長行焉比跡誦必其
響庶君偕老靈根克固附翼雲霄雙飛天路人皆年長
君獨短祚穀則同朝遊矣先暮

弔文

弔魏武帝文

元康八年機始以臺郎出補著作游乎祕閣而見魏武
帝遺令慨然歎息傷懷者久之客曰夫始終者萬物之
大歸死生者性命之區域是以臨喪殯而後悲覩陳根

而絕哭今乃傷心百年之際興哀無情之地意者無乃知哀之可有而未識情之可無乎機答之曰夫日蝕由乎交分山崩起於朽壤亦云數而已矣然百姓怪焉者豈不以資高明之質而不免卑濁之累居常安之勢而終嬰傾離之患故乎夫以迴天倒日之力而不能振形骸之內濟世夷難之智而受困魏闕之下已而格乎上下者藏於區區之木光於四表者翳乎叢爾之土雄心摧於弱情壯圖終於哀志長算屈於短日遠跡頓於促

路嗚呼豈特瞽史之異闕景黔黎之怪類岸乎觀其所
以顧命冢嗣貽謀四子經國之略既遠隆家之訓亦弘
又云吾在軍中持法是也至於小忿怒大過失不當效
也善乎達人之讜言矣持姬女而指季豹以示四子曰
以累汝因泣下傷哉曩以天下自任今以愛子託人同
乎盡者無餘而得乎亡者無存然而婉孌房闥之內綢
繆家人之務則幾乎密與又曰吾嬖好妓人皆著銅雀
臺於臺堂上施八尺牀總帳朝晡上脯糒之屬月朝十

五日輒向帳作妓妝等時時登銅雀臺望吾西陵墓田
又云餘香可分與諸夫人諸舍中無所為學作履組賣
也吾歷官所得綬皆著藏中吾餘衣裘可別為一藏不
能者兄弟可共分之既而竟分焉亡者可以勿求存者
可以勿違求與違不其兩傷乎悲夫愛有大而必失惡
有甚而必得智慧不能去其惡威力不能全其愛故前
識所不用心而聖人罕言焉若乃繫情累於外物留曲
念於閨房亦賢俊之所宜廢乎於是遂憤懣而獻弔云

爾

接皇漢之末緒值王塗之多違佇重淵以育鱗撫慶雲
而遐飛運神道以載德乘靈風而扇威摧羣雄而電擊
舉勅敵其如遺指八極以遠略必翦焉而後綏釐三才
之闕典啟天地之禁闡舉修綱之絕紀紐大音之解微
掃雲物以貞觀要萬塗而來歸丕大德以宏覆援日月
而齊暉濟元功於九有固舉世之所推彼人事之大造
夫何往而不臻將覆簣於浚谷擠為山乎九天苟理窮

而性盡豈長算之所研悟臨川之有悲固梁木其必顛
當建安之三八實大命之所艱雖光昭於曩載將稅駕
於此年惟降神之綿邈眇千載而遠期信斯武之未喪
膺靈符而在茲雖龍飛於文昌非王心之所怡憤西夏
以鞠旅汧秦川而舉旗踰鎬京而不豫臨渭濱而有疑
翼翼日之云瘳彌四旬而成災詠歸塗以返旆登峭澗
而竭來次洛汭而大漸指六軍曰念哉伊君王之赫奕
寔終古之所難威先天而蓋世力盪海而拔山厄奚險

而弗濟敵何強而不殘每因禍以禔福亦踐危而必安
迄在茲而蒙昧慮噤閉而無端委軀命以待難痛沒世
而永言撫四子以深念循膚體而頽歎迨營魄之未離
假餘息乎音翰執姬女以嘔瘁指季豹以灌焉氣衝襟
以嗚咽涕垂睫而汎瀾違率土以靜寐戢彌天乎一棺
咨玄度之峻邈壯大業之允昌思居終而恤始命臨歿
而肇揚援貞吝以甚悔雖在我而不減惜內顧之纏綿
恨末命之微詳紆廣念於履組塵清慮於餘香結遺情

於婉孌何命促而意長陳法服於帷座陪窈窕於玉房
宣備服於虛器發哀音於舊倡矯戚容以赴節掩零淚
而薦觴物無微而不存體無慧而不止庶聖靈之響像
想幽神之復光苟形聲之翳沒雖音景其必藏徽清絃
而獨奏進脯糒而誰嘗悼總帳之冥漠怨西陵之茫茫
登雀臺而羣悲貯美目其何望既晞古以遺累信簡禮
而薄葬彼裘紱於何有貽塵謗於後王嗟大戀之所存
故雖哲而不忘覽遺籍以慷慨獻茲文而悽傷

弔蔡邕文

彼洪川之方割豈一簣之所堙故尼父之惠訓智必愚
而後賢諒知道之已妙曷信道之未堅忽甯子之保已
效長叔之違天冀澄河之遠日望朝露之短年


哀辭

吳大司馬陸公少女哀辭

冉冉晞陽不遂其茂暉暉芳華彫芳落秀遵堂涉室髣
髴興想人皆有聲爾獨無響



漢魏六朝百三家集卷四十八



總校官庶吉士臣侍朝

校對官庶吉士臣何思鈞

謄錄監生臣張元信

欽定四庫全書薈要

集部

漢魏六朝百三家集卷四十九



欽定四庫全書薈要卷一萬九千六百三十八

集部

漢魏六朝百三家集卷四十九

明 張溥 輯

陸機集

樂府

短歌行

以下
四言

置酒高堂悲歌臨觴人壽幾何逝如朝霜時無重至華
不再揚蘋以春暉蘭以秋芳來日苦短去日苦長今我

不樂蟋蟀在房樂以會興悲以別章豈曰無感憂為子
忘我酒既旨我有既臧短歌有詠長夜無荒

秋胡行

道雖一致途有萬端吉凶紛藹休咎之源人鮮知命命
未易觀生亦何惜功名所歎

隴西行

我靜如鏡民動如煙事以形兆應以象懸豈曰無才世
鮮興賢

日出東南隅行

或曰羅敷艷歌
○以下五言

扶桑升朝暉照此高臺端
高臺多妖麗濬房出清顏
淑貌耀皎日惠心清且閑
美目揚玉澤蛾眉象翠翰
鮮膚一何潤秀色若可餐
窈窕多容儀婉媚巧笑言
暮春春服成粲粲綺與紈
金雀垂藻翹玉佩結瑤璠
方駕揚清塵濯足洛水瀾
藹藹風雲會佳人一何繁
南崖充羅幕北渚盈軒軒
清川含藻景高岸被華丹
馥馥芳袖揮泠泠纖指彈
悲歌吐清響雅舞播幽蘭
丹唇含九秋妍

迹陵七盤赴曲迅驚鴻蹈節如集鸞綺態隨顏變沈姿
無定一作乏源俯仰紛阿那顧步咸可懽遺芳結飛颺浮
景映清湍冶容不足詠春遊良可歎

挽歌三首

卜擇考休貞嘉命咸在茲夙駕警徒御結轡頓重基龍
旒被廣柳前驅矯輕旗殯宮何嘈嘈哀響沸中闈中闈
且勿喧聽我薤露詩死生各異倫祖載當有時舍爵兩
楹位啟殯進靈輜飲餞觴莫舉出宿歸無期帷衽曠遺

影棟宇與子辭周親咸犇湊友朋自遠來翼翼飛輕軒
駸駸策素騏案轡遵長薄送子長夜臺呼子子不聞
泣子子不知歎息重觀側念我疇昔時三秋猶足收萬世
安可思殉沒身易亡殺子非所能含言言哽咽揮涕涕
流離

流離親友思惆悵神不泰素驂佇轡軒元駟驚飛蓋哀
鳴興殯宮迴遲悲野外魂輿寂無響但見冠與帶備物
象平生長旌誰為飾悲風徽行軌傾雲結流靄振策指

靈丘駕言從此逝

重阜何崔嵬玄廬竄其間磅礴立四極穹隆放蒼天側

聽陰溝涌臥觀天井懸塘

五臣作廣

宵何寥廓大暮安可晨

人往有返歲我行無歸年昔居四民宅今託萬鬼隣昔
為七尺軀今成灰與塵金玉素所佩鴻毛今不振豐肌
饗螻蟻妍姿永夷泯壽堂延魑魅虛無自相賓螻蟻爾
何怨魑魅我何親拊心痛荼毒永歎莫為陳

長歌行

逝矣經天日悲哉帶地川寸陰無停晷尺波豈徒旋年
往信勁矢時來亮急弦遠期鮮克及盈數固希全容華
夙夜零體澤坐自捐茲物苟難停吾壽安得延俛仰逝
將過倏忽幾何間慷慨亦焉訴天道良自然但恨功名
薄竹帛無所宣迨及歲未暮長歌乘我閑

君子行

天道夷且簡人道險而難休咎相乘躡翻覆若波瀾去
疾若不遠疑是實生患近火固宜熱履冰豈惡寒掇蜂

滅天道拾塵惑孔顏逐臣尚何有棄友焉足歎福鍾恒
有兆禍集非無端天損未易辭人益猶可懼朗鑒豈遠
假取之在傾冠近情苦自信君子防未然

從軍行

苦哉遠征人飄飄

五臣作飄

窮四遐南陟五嶺巔北戍長城

阿深

五臣作谿

谷邈

五臣作深

無底崇山鬱嵯峨奮臂攀喬木振

迹涉流沙隆暑固已慘涼風嚴且苛夏條焦鮮藻寒冰

結衝波胡馬如雲屯越旗亦星羅飛鋒無絕影鳴鏑自

相和朝飡不免宵夕息常荷戈苦哉遠征人撫心悲
如何

苦寒行

北遊幽朔城涼野多險難

五臣作艱

俯入窮谷底仰陟高山

盤凝冰結重礧積雪被長齋陰雲興巖側悲風鳴樹端
不覩白日景但聞寒鳥喧猛虎憑林嘯元猿臨岸歎夕
宿喬木下慘愴恒鮮歡渴飲堅冰漿飢待零露餐離
思固已久寤寐莫與言劇哉行役人慊慊恒苦寒

豫章行

汎舟清川渚遙望高山陰川陸殊塗軌懿親將遠尋三
荆歡同株四鳥悲異林樂會良自古悼別豈獨今寄世
將幾何日是無停陰前路既已多後塗隨年侵促促薄
暮景亶亶鮮克禁曷為復以茲曾是懷苦心遠節嬰
物淺近情能不深行矣保嘉福景絕繼以音

長安有狹邪行

伊洛有岐路岐路交朱輪輕蓋承華景騰步躡飛塵鳴

玉豈樸儒憑軾皆俊民烈心厲勁秋麗服鮮芳春余本
倦遊客豪彥多舊親傾蓋承芳訊欲鳴當及晨守一不
足矜岐路良可遵規行無曠迹矩步豈逮人投足緒已
爾四時不必循將遂殊塗軌要子同歸津

塘上行

江離生幽渚微芳不足宣被蒙風雲會移居華池邊發
藻玉臺下垂影滄浪泉霑潤既已渥結根奧且堅四節
逝不處繁華難久鮮淑氣與時殞餘芳隨風捐天道有

遷易人理無常全男懼智傾愚女愛衰避妍不惜微軀
還恒懼蒼蠅前願君廣末光照妾薄暮年

折楊柳

邈矣垂天景壯哉奮地雷豐隆豈久響華光但西隤日
落似有竟時逝恒若摧仰悲朗月運坐觀旋蓋迴盛門
無再入衰房莫苦開人生固已短出處鮮為諧慷慨惟
昔人興此千載懷升龍悲絕處葛藟變條救寤寐豈
虛歎曾是感與摧弭意無足歡願言有餘哀

飲馬長城窟行

驅馬陟陰山山高馬不前往問陰山候勁虜在燕然戎
車無停軌旌旆屢徂遷仰憑積雪巖俯涉堅冰川冬來
秋未反去家邈以綿獫狁亮未夷征人豈徒旋末德爭
先鳴凶器無兩全師克薄賞行軍沒微軀捐將遵甘陳
迹收功單于旃振旅勞歸士受爵蒙街傳

門有車馬客行

門有車馬客駕言發故鄉念君久不歸濡迹涉江湘投

袂赴門塗攬衣不及裳拊膺携客泣掩淚叙溫涼借
問邦族間惻愴論存亡親友多零落舊齒皆彫喪市朝
忽遷易城闕或丘荒墳壟日月多松柏鬱鬱芒芒天道信
崇替人生安得長慷慨惟平生俛仰獨悲傷

櫂歌行

遲遲暮春日天氣柔且嘉元吉隆初已濯穢遊黃河龍
舟浮鷁首羽旗垂藻葩乘風宣飛景逍遙戲中波名
謳激清唱傍人縱棹歌投綸沈洪川飛繳入紫霞

太山吟

太山一何高迢迢造天庭峻極周已遠曾雲鬱冥冥梁
甫亦有館蒿里亦有亭幽塗延萬鬼神房集百靈長
吟太山側慷慨激楚聲

梁甫吟

玉衡既已驂羲和若飛凌四運循環轉寒暑自相承冉
冉年時暮迢迢天路微招搖東北指大火西南昇悲風
無絕響玄雲互相仍豐冰憑川結零一作寒露彌天凝年

命時相逝慶雲鮮克乘履信多愆期思順焉足憑
愴臨川響非此孰為興哀吟梁甫巔慷慨獨拊膺

東武吟行

投迹短世間高步長生闔濯髮冒雲冠浣身被羽衣飢
從韓衆餐寒就佚女棲

婕妤怨

婕妤去辭寵淹留終不見寄情在玉階託意惟團扇春

苔暗階除秋草蕪高殿黃昏

一作昏黃

履綦絕愁來空雨面

駕言出北闕行

駕言出北闕躑躅遵山陵長松何鬱鬱丘墓互相承念
昔徂歿子悠悠不可勝安寢重冥廬天壤莫能興人生
何所促忽如朝露凝辛苦百年間戚戚如履冰仁智亦
何補遷化有明徵求仙鮮克仙太虛不可凌良會罄美
服對酒宴同聲

君子有所思行

命駕登北山延佇望城郭塵里一何盛街巷紛漠漠甲

第崇高闔洞房結阿閣曲池何湛湛清川帶華薄邃
宇列綺窓蘭室接羅幕淑貌色斯升哀音承顏作人
生誠行邁容華隨年落善哉膏粱士營生奧且博宴安
消靈根鳩毒不可恪無以肉食資取笑葵與藿

悲哉行

游客芳春林春芳傷客心和風飛清響鮮雲垂薄陰蕙
草饒淑氣時鳥多好音翩翩鳴鳩羽喈喈倉庚音

五臣
作吟

幽蘭盈通谷長秀被高岑女蘿亦有託蔓葛亦有尋

傷哉客遊士憂思一何深目感隨氣草耳悲詠時禽寤
寐多遠念緬然若飛沈願託歸風響寄言遺所欽

齊謳吟

營丘負海曲沃野爽且平洪川控河濟崇山入高冥東
被姑尤側南界聊攝城海物錯萬類陸產尚千名孟諸
吞楚夢百二倖秦京惟師恢東表桓后定周傾天道有
迭代人道無久盈鄙哉牛山嘆未及至人情爽鳩苟已
徂吾子安得停行行將復去長存非所營

吳趨行

楚妃且勿歎齊娥且勿謳四坐並清聽聽我歌吳趨吳
趨自有始請從閭門起閭門何峨峨飛閣跨通波重櫺
承游極回軒啟曲阿藹藹慶雲被泠泠祥風過山澤多
藏育土風清且嘉泰伯導仁風仲雍揚其波穆穆延陵
子灼灼光諸華王迹隕陽九帝功興四遐大皇自富春
矯首頓世羅邦彥應運興粲若春林葩屬城咸有士吳
邑最為多八族未足侈四姓實名家文德淳熙懿武功

侔山河禮讓何濟濟流化自滂沱淑美窮難紀商摧為此歌

前緩聲歌

游仙聚靈族高會層城阿長風萬里舉慶雲鬱差我
宓妃興洛浦王韓起太華北徵瑤臺女南要湘川娥肅
肅宵駕動翩翩翠蓋羅羽旗棲瓊鸞玉衡吐鳴和太容揮
高絃洪崖發清歌獻酬既已周輕舉乘紫霞總轡扶
桑枝濯足暘谷波清輝溢天門垂慶惠皇家

吳趨行

蠶滿蓋重簾唯有遠相思
藕葉清朝釧何見早還時

飲酒樂

飲酒須飲多人生能幾何
百年須受樂莫厭管絃歌

董桃行

以下
六言

和風習習薄林柔條布葉垂
陰鳴鳩拂羽相尋倉庚啾啾
弄音感時悼逝傷心日月相
追周旋萬里倏忽幾年人皆
冉冉西遷盛時一往不還慷慨
平念悽然昔

為少年無憂常恹秉燭夜游翩翩宵征何求于今知此
有絲但為老去年道盛固有哀不疑長夜冥冥無期
何不驅馳及時聊樂永日自怡齋此遺情何之人生
居世為安豈若及時為歡世道多故萬端憂慮紛錯
交顏老行及之長歎

上留田行

嗟行人之藹藹駿馬陟原風馳輕舟泛川雷邁寒往暑
來相尋零雪霏霏集宇悲風徘徊入襟歲華冉冉方

除我思纏綿未紓感時倬逝悽如

飲酒樂

樂府作還臺樂
謂陳陸瓊詩誤

蒲萄四時芳醇瑠璃千鍾舊賓夜飲舞遲銷燭朝醒絃
促催人春風秋月恒好驩醉日月言新

燕歌行

七言

四時代序逝不追寒風習習落葉飛蟋蟀在堂露盈墀
念君客游常苦悲君何緬然久不歸賤妾悠悠心無違
白日既沒明燈輝夜一作寒禽赴林匹鳥棲雙鴝闌闌宿

河湄憂來感物涕不晞非君之念思為誰別日何早會
何遲

猛虎行

以下
雜言

渴不飲盜泉水熱不息惡木陰惡木豈無枝志士多苦
心整駕肅時命杖策將遠尋飢食猛虎窟寒棲野雀林
日歸功未建時往歲載陰崇雲臨岸駭鳴條隨風吟靜
言幽谷底長嘯高山岑急絃無懦響亮節難為音人生
誠未易曷云開此衿眷我耿介懷俯仰愧古今

鞠歌行

序曰按漢宮閣有含章鞠室靈芝鞠室後漢馬防
第宅卜臨道連閣通池鞠城彌於街路鞠歌將謂
此也又東阿王詩連騎擊壤或謂感鞠乎三言七
言雖奇寶名器不遇知己終不見重願逢知己以
託意焉

朝雲升應龍攀乘風遠遊騰雲端鼓鍾歇豈自歡急絃
高張思和彈時希值年夙愆循已雖易人知難王陽登

貢公歡罕生既沒國子歎嗟千載豈虛言邈矣遠念情
愴然

順東西門行

山西門望天庭陽谷既虛崦嵫盈感朝露悲人生逝者
若斯安得停桑樞戒蟋蟀鳴我今不樂歲聿征迨未暮
及時平置酒高堂宴友生激朗笛彈哀箏取樂今日
盡歡情

日重先行

日重光奈何天迴薄日重光冉冉其遊如飛征日重光今我
日華華之盛日重光倏忽過亦安停日重光盛往衰亦
必來日重光譬如四時固恒相催日重光惟命有分可
營日重光但惆悵才志日重光身沒之後無遺名

月重輪行

人生一時月重輪盛年安可持月重輪吉凶倚伏百年
莫我與期臨川曷悲悼茲去不從肩月重輪功名不勛
之善哉古人揚聲敷聞九服身名流何穆既自才難

既嘉運亦易憊俛仰行老存沒將何所觀志士慷慨獨
長歎獨長歎

百年歌十首

一十時顏如薜華眩有暉體如飄風行如飛變彼孺子
相追隨終朝出遊薄暮歸六情逸豫心無違清酒漿
炙奈樂何清酒漿炙奈樂何

二十時膚體彩澤人理成美目淑貌灼有榮被服冠帶
麗且清光車駿馬遊都城高談雅步何盈盈清酒漿

炙奈樂何清酒漿炙奈樂何

三十時行成名立有令聞力可扛鼎志干雲食如漏卮
氣如薰辭家觀國綜典文高冠素帶煥翩紛清酒漿
炙奈樂何清酒漿炙奈樂何

四十時體力克壯志方剛跨州越郡還帝鄉出入承明
擁大璫清酒漿炙奈樂何清酒漿炙奈樂何

五十時荷旄仗節鎮邦家鼓鐘嘈囀趙女歌羅衣綵
粲金翠華言笑雅舞相經過清酒漿炙奈樂何清

清漿炙奈樂何

六十時年亦耆艾業亦隆駢駕四牡入紫宮軒冕婀娜翠雲
中子孫昌盛家道隆清酒漿炙奈樂何清酒漿炙奈樂何
七十時精爽頗損膂力愆清水明鏡不欲觀臨樂對

清轉無歡攬衣羞

一作脩

髮獨長歎

八十時明已損目聰去耳前言往行不復紀辭官致祿
歸桑梓安車駟馬入舊里樂事告終憂事始

九十時日告耽瘁月告衰形體雖是志意非言多謬

誤心多悲子孫朝拜或問誰指景玩日慮安危感念平生淚交揮

百歲時盈數已登肌肉單四支百節還相患目苦濁鏡口垂涎呼吸頻感反側難茵褥滋味不復安

詩

皇太子宴玄圃宣猷堂有令賦詩

三正迭紹洪聖啟運自昔哲王先天而順羣辟崇替降及近古黃暉既渝素靈承祐乃眷斯顧祚之宅土三后

始基世武丕承協風旁駭天晷仰澄淳曜六合皇慶攸
興自彼河汾奄齊七政時文惟晉世篤其聖欽翼昊天
對揚成命九區克咸謳歌以詠皇上纂隆經教弘道于
化既豐在工載考俯釐庶績仰荒大造儀刑祖宗妥綏
天保篤生我后克明克秀體輝重光承規景數茂德淵
沖天姿玉裕叢爾小臣邈彼荒遐弛厥負擔振英承華
匪願伊始惟命之嘉

皇太子賜讌詩

明明隆晉茂德有赫思媚上帝配天光宅誕育皇儲儀
刑在昔徽言時宣福祿來格勞謙降貴肆敬下臣肇彼
先驅翻成嘉賓

贈馮文羆遷斥丘令

八章

於皇聖世時文惟晉受命自天奄有黎獻閭闔既闢承
華再建明明在上有集惟彥

奕奕馮生哲問允迪天保定子靡德不鏤邁心玄曠矯
志崇邈遵彼承華其容灼灼

嗟我人斯戢翼江潭有命集止翻飛自南出自幽谷及
爾同林雙情交映遺物識心

人亦有言交道實難有類者弁千載一彈今我與子曠
世齊歡利斷金石氣惠秋蘭

羣黎未綏帝用勤止我求明德肆於百里僉曰爾諧俾
民是紀及眷北徂對揚帝祉

疇昔之遊好合纏綿借曰未給

五臣作洽

亦既三年居陪華

幄出從朱輪方驥齊鑣比迹同塵

之子既命四牡項領遵塗遠蹈騰軌高騁慶雲扶質清
風承景嗟我懷人其邁惟永

否泰有

善作苟

殊窮達有違及子春華後爾秋暉逝將去

我陟彼朔陲非子之念心孰為悲

答賈謐

十一章有序

鄉人有夏侯威者少有成人之風余尚其為人與之
昵好王師振旅送余於魏邦心有眷然為之隕涕乃
作離友之詩其辭曰

伊昔有皇肇濟黎烝先天創物景命是膺降及羣后
迭毀迭興邈矣終古崇替有徵

在漢之季皇綱幅裂大辰匿暉金虎曜質雄臣馳騫義
夫赴節釋位揮戈言謀王室

王室之亂靡邦不泯如彼隆景曾不可振乃眷三哲俾
乂斯民啟土綏難改物承天

爰茲有魏即宮天邑吳實龍飛劉亦岳立干戈載揚俎
豆載戢民勞師興國玩凱入

天厭霸德皇祚告釁獄訟違魏謳歌適晉陳留歸藩我
皇登禪庸岷稽顙三江改獻

赫矣隆晉奄宅率土對揚天人有秩斯祜惟公太宰光
翼二祖誕育洪胄纂戎于魯

東朝既建淑問我我我求明德濟同以和魯公戾止袞
服委蛇思媚皇儲高步承華

昔我逮茲時惟下僚及子棲遲同林異條年殊志比服
舛義稠游跨三春情固二秋

祇承皇命出納無違往踐蕃朝來步紫微升降祕閣我
服載暉孰云匪懼仰肅明威

分索則易攜手實難念昔良游茲焉詠歎公之云感貽
此音翰蔚彼高藻如玉之闌

惟漢有木曾不踰境惟南有金萬邦作詠民之胥好狷
狂厲聖儀刑在昔子聞子命

贈弟士龍

余弱年夙孤與弟士龍銜卹喪庭續會逼王命墨經

即戎時並縈髮悼心告別漸歷八載家邦顛覆凡厥
同生彫落殆半收迹之日感物興哀而龍又先在四時
迫當祖載二昆不容逍遙銜痛東徂遺情西慕故作
是詩以寄其哀苦焉

於穆予宗稟精東嶽誕育祖考造我南國南國克靖實
繇洪績惟帝念功載繁其錫其錫惟何玄冕袞衣金石
假樂旄鉞授威匪威是信稱平遠德奕世台衡扶帝紫
極

篤生三昆克明克俊遵塗結轍承風襲問帝曰欽哉纂
戎列祚雙組式帶綬章載路即命荆楚對揚休顧肇敏
厥績武功聿舉烟煴芳素綢繆江許昊天不弔胡寧棄
予

嗟予人斯胡德之微闕彼遺軌則此頑違王事匪監於
旆屢振委籍舊戈統厥征人祈祈征人載肅載閑駉
駉戎馬有闕有翰昔子翼考惟斯伊撫今予小子繆尋
末緒

有命自天崇替靡常王師乘運席卷江湘雖

闕

守守

從武臣守局下列譬彼飛塵洪波雷擊與衆同泯顛跋

西夏收迹舊京俯慚堂構仰懷

藝文類聚作惟

先靈孰云忍愧

寄之我情

伊我俊弟咨爾士龍懷襲瑰瑋播殖清風非德莫勤非

道莫弘垂翼東畿耀頡名邦綿綿洪統非爾孰崇依依

同生恩篤情結義存並濟胡樂之悅願爾偕老携手黃

髮

昔我西征扼腕川湄掩涕卽路耀袂長辭六龍促節逝
不我待自往迄茲曠年八祀悠悠我思非爾焉在昔並
垂髮今也將老銜哀茹感契濶充飽嗟我人斯胡卹之
早

天步多艱性命難誓常懼隕斃孤魂殊裔存不阜物沒
不增壤生若朝風死猶絕景視彼浮遊方之僑客眷此
黃廬譬之斃宅匪身是宏亮會伊惜其惜伊何言紆其
思其思伊何悲彼曠載

出車戒塗言告言歸蓐食驚駕夙興宵馳濛雨之陰炤
月之輝陸陵峻坂川越洪漪爰屆爰止步彼高堂失爾羽
邁良願中荒我心永懷匪悅匪康

昔我斯逝兄弟孔仁今我來思或彫或疚昔我斯逝族
有餘榮今我來思堂有哀聲我行其道鞠為茂草我履
其房物存人亡撫膺涕泣血淚彷徨

企佇朔路言送爾歸心存言宴日想容輝迫彼窀穸載
驅東路繼其桑梓肆力丘墓婉兮孌兮興懷罔極眷言

顧之使我心惻

贈潘尼

水會于海雲翔于天道之所混孰後孰先及子雖殊同
升太玄舍彼玄冕襲此雲冠遺情市朝永志丘園靜猶
幽谷動若揮蘭

答潘尼

於穆同心如瓊如林我東日徂來餞其琛彼美潘生實
綜我心探我玉懷疇爾惠音

贈馮文憲

以下五言

昔與二三子游息承華南
拊翼同枝條翻飛各異尋
苟無凌風翮徘徊守故林
慷慨誰為感願言懷所欽
發軔清洛汭驅馬大河陰
佇立望朔塗悠悠迥且深
分索古所悲志士多苦心
悲情臨川結苦言隨風吟
愧無雜佩贈良訊代兼金
夫子茂遠猷款誠寄惠音

於承明作與弟士龍

牽世嬰時網駕言遠徂征
飲餞豈異族親戚弟與兄
婉

戀居人思紆鬱游子情明發遺安寐晤言涕交纓分途
長林側揮袂萬始亭佇眄要遐景傾耳玩餘聲南歸憇
永安北邁頓承明永安有昨軌承明子棄子俯仰悲林
薄慷慨含辛楚懷往歡絕端悼來憂成緒感別慘舒翻
思歸樂遵渚

贈弟士龍

行矣怨路長愁焉傷別促指途悲有餘臨觴歡不足我
若西流水子為東峙岳慷慨逝言感徘徊居情育安得

攜手俱契濶成駢服

贈尚書郎顧彥先二首

大火貞朱光積陽熙自南望舒離金虎屏翳吐重陰淒
風迄時序苦雨遂成霖朝游忘輕羽夕息憶重衾感物
百憂生纏綿自相尋與子隔蕭牆蕭牆阻且深形影曠
不接所託聲與音音聲日夜濶何用慰吾心

朝遊遊層城夕息旋直廬迅雷中宵激驚電光夜舒玄
雲拖朱閣振風薄綺䟽豐注溢修雷潢潦浸階除停陰

結不解通衢化為渠沈稼湮梁穎流民汴荆徐眷言懷
桑梓無乃將為魚

贈顧交趾公真

顧侯體明德清風肅已邁發迹翼藩后改授撫南裔
伐鼓五嶺表揚旌萬里外遠績不辭小立德不在大高
山安足凌巨海猶縈帶惆悵瞻飛駕引領望歸旆

答張士然

潔身躋祕閣祕閣峻且玄終朝理文案薄暮不遑眠

善作

瞑駕言巡明祀致敬在祈年逍遙春王圃

五臣作圃

躑躅千

畝田迴渠繞曲陌通波扶直阡嘉穀垂重穎芳樹發華顛余固水鄉士總轡臨清淵戚戚多遠念行行遂成篇

贈從兄車騎

孤獸思故藪離鳥悲舊林翩翩游宦子辛苦誰為心
髣髴谷水陽婉孌崑山陰營魄懷茲土精爽若飛沈寤
寐靡安豫願言思所欽感彼歸途艱使我怨慕深安得
忘憂草言樹背與襟斯言豈虛作思鳥有悲音

為顧彥先贈婦二首

辭家遠行游悠悠三千里京洛多風塵素衣化為緇修身悼憂苦感念同懷子隆思亂心曲沈歡滯不起歡沈難克興心亂誰為理願假歸鴻翼翻飛游江汜

東南有思婦長歎充幽閨借問歎何為佳人眇天末游宦久不歸山川脩且濶形影參商乖音息曠不達離合非有常譬彼絃與筈願保金石軀慰妾長飢渴

為陸思遠婦作

二合兆嘉偶女子禮有行潔已入德門終遠母與兄如
何就時寵游官忘歸寧雖為三載婦顧景媿虛名歲暮
饒悲風洞房涼且清拊枕循薄質非君誰見榮離君多
悲心寤寐勞人情敢忘桃李陋側想瑤與瓊

為周夫人贈車騎

碎碎織細練為君作繡君行豈有顧憶君是妾夫昔
者得君書聞君在高平今時得君書聞君在京城京城
華麗所璀璨多異人男兒多遠志豈知妾念君昔者與

君別歲律薄將暮日月一何速素秋墜湛露湛露何冉冉思君歲隨晚對食不能食臨觴不能飯

祖道畢雍孫劉邊仲潘正仲

皇儲延髦俊多士出幽遐適值一作遂時來運與子游承

華執笏宗賢內振纓層城阿畢劉贊文武潘生泣邦家感別懷遠人願言歎以嗟

赴洛二首

希世無高符營道無烈心靖端肅有命假檝越江潭親

友贈予邁揮淚廣川陰撫膺解携手永歎結遺音無迹
有所匿寂寞聲必沈肆目眇不及緬然若雙潛南望泣
玄渚北邁涉長林谷風拂脩薄油雲翳高岑疊疊孤獸
騁嚶嚶思鳥吟感物戀堂室離思一何深佇立愴我歎
寤寐涕盈衿惜無懷歸志辛苦誰為心

羈旅遠遊宦託身承華側撫劍遵銅輦振纓盡祗肅歲

月一何易寒暑忽已革載離多悲心感物情悽惻慷慨

遺安豫

五臣作念

永歎廢餐食思樂樂誰誘曰歸歸未克憂

苦欲何為纏綿胸與臆
仰瞻凌霄鳥羨爾歸飛翼

赴洛道中作二首

總轡登長路鳴咽辭密親
借問子何之世網嬰我身
永歎遵北渚遺思結南津
行行遂已遠野途曠無人
山澤紛紆餘林薄杳阡
眊虎嘯深谷底鷄鳴高樹
巔哀風中夜流孤獸更我
前悲情觸物感沈思鬱纏
綿佇立望故鄉顧影懷自
憐

遠游越山川山川脩且廣
振策陟崇丘安轡遵平莽
夕

息抱影寐朝徂銜思往頓轡倚嵩巖側聽悲風響清露
墜素輝明月一何朗撫几不能寐振衣獨長想

吳王郎中時從梁陳作

在昔蒙嘉運矯迹入崇賢假翼鳴鳳條濯足升龍淵玄
冕無醜士冶服使我妍輕劍拂繁厲五臣作彌長纓麗且鮮

誰謂伏事淺契濶踰三年薄言肅後命改服就藩臣夙
駕尋清軌遠游越梁陳感物多遠念慷慨懷古人

擬行行重行行

悠悠行邁遠戚戚憂思深此思亦何思思君徽與音音
徽日夜離緬邈若飛沈王鮪懷河岫晨風思北林遊子
眇天末還期不可尋驚飈褰反信歸雲難寄音佇立想
萬里沈憂萃我心攬衣有餘帶循形不盈衿去去遺情
累安處撫清琴

擬今日良宴會

閒夜命懽友置酒迎風館齊僮梁甫吟秦娥張女彈哀
音繞棟宇遺響入雲漢四座咸同志羽觴不可算高談

一何綺蔚若朝霞爛人生無幾何為樂常苦晏譬言彼伺
晨鳥揚聲當及旦曷為恒憂苦守此貧與賤

擬迢迢牽牛星

昭昭清漢輝粲粲光天步牽牛西北迴織女東南顧華
容一何冶揮手如振素怨彼河無梁悲此年歲暮跂彼
無良緣睨焉不得度引領望大川雙涕如霑露

擬涉江采芙蓉

上山采瓊蘂窮谷饒芳蘭采采不盈掬悠悠懷所歡故

鄉一何曠山川阻且難沈思鍾萬里躑躅獨吟歎

擬青青河畔草

靡靡江離草熠熠生河側皎皎彼姝女阿那當軒織粲
粲妖容姿灼灼美顏色良人遊不歸偏棲獨隻翼空房
來悲風中夜起歎息

擬明月何皎皎

安寢北堂上明月入我牖照之有餘輝攬之不盈手涼
風繞曲房寒蟬鳴高柳踟躕感節物我行永已久游宦

會無成離思難常守

擬蘭若生朝陽

嘉樹生朝陽凝霜封其條執心守時信歲寒終不彫
美人何其曠灼灼在雲霄隆想彌年月長嘯入飛颺
引領望天末譬彼向陽翹

擬青青陵上栢

冉冉高陵蘋習習隨風翰人生當幾時譬彼濁水闌
戚戚多滯念置酒宴所歡方駕振飛轡遠遊入長安
名都

一何綺城闕鬱盤桓飛閣纓虹帶層臺冒雲冠高門羅
北闕甲第椒與蘭俠客控絕景都人驂玉軒遨遊放情
願慷慨為誰歎

擬東城一何高

西山何其峻層曲鬱崔嵬零露彌天墜蕙葉憑林衰
寒暑相因襲時逝忽如頽三閭結飛轡大耋嗟落暉曷
為牽世務中心若有違京洛多妖麗玉顏倂瓊蕤閒夜
撫鳴琴惠音清且悲長歌赴促節哀響逐高徽一唱

萬夫歎再唱梁塵飛思為河曲烏雙游澧水湄

擬西北有高樓

高樓一何峻迢迢

善作茗茗

峻而安綺窗出塵冥飛陞躡雲

端佳人撫琴瑟纖手清且閒芳氣隨風結哀響馥若蘭

玉容誰能

五臣作得

顧傾城在一彈佇立望日是躑躅再三

歎不怨佇立久但願歌者歡思駕歸鴻羽比翼雙飛翰

擬庭中有奇樹

歡友蘭時往迢迢匿音徽虞淵引絕景四節逝若飛芳

草久已茂佳人竟不歸
躑躅遵林渚惠風入我懷
感物戀所歡采此欲貽誰

擬明月皎夜光

歲暮涼風發昊天肅明明
招搖西北指天漢東南傾
朗月照閒房蟋蟀吟戶庭
翻翻歸鴈集嘒嘒寒蟬鳴
疇昔同宴友翰飛戾高冥
服美改聲聽居愉遺舊情
織女無機杼大梁不架楹

招隱詩

明發心不夷振衣聊躑躅躑躅欲安之幽人在浚谷朝
采南澗藻夕息西山足輕條象雲構密葉承翠幄激楚
佇蘭林回芳薄秀木山溜何泠泠飛泉漱鳴玉哀音附
靈波頽響赴曾曲至樂非有假安事澆淳樸富貴苟難
圖稅駕從所欲

遨遊出西城

遨遊出西城鞍轡循都邑逝物隨節改時風肅且熠遷
化有常然盛衰自相襲靡靡年時改冉冉老已及行矣

勉良圖使爾修名立

園葵詩二首

種葵北園中葵生鬱萋萋朝榮西北傾夕頽西南晞零
露垂鮮澤朗月耀其輝時逝柔風戢歲暮商飈飛曾雲
無溫液嚴霜有凝威幸蒙高墉德玄景蔭素蕤豐條竝
春盛落葉後秋衰慶彼晚彫福忘此孤生悲

翩翩晚彫葵孤生寄北藩被蒙覆露惠微軀後時殘庇
足周一智生理各萬端不若聞道易但傷知命難

贈斥丘令馮文羆

出駕出東城送子臨江曲
密席接同志羽觴飛鄴淥
登樓望峻陂時逝一何速

贈顧彥先

清夜不能寐悲風入我軒
立影對孤軀哀聲應苦言

贈紀士

瓊瓌俟豐價窈窕不自鬻
有美蛾眉子惠音清且淑
脩姱協姝麗華顏婉如玉

贈潘正叔

過蒙時來運與爾遊承華執笏崇資內振纓曾城阿

招隱二首

駕言尋飛遯山路鬱盤桓芳蘭振蕙葉玉泉涌微瀾嘉
卉獻時服靈術進朝餐

尋山求逸民穹谷幽且遐清泉盪玉渚文魚曜中波

尸鄉亭

東遊觀鞏洛逍遙丘墓間秋草漫長柯寒水入雲煙發

軫有夙宴息駕無愚賢

三月三日

遲遲暮春日天氣柔且佳
元吉隆初已濯穢游黃河

春詠

節運同可悲莫若春氣甚
和風未及燠遺涼清且凜

詠老

軟顏收紅蘂玄鬢吐素華
冉冉逝將老咄咄奈老何

講漢書詩

稅駕金華講學祕館有集惟髦芳風雅宴

秋詠

肅肅素秋節湛湛濃露凝太陽夙夜降少陰忽已升

失題 二首

太素卜令宅希微啟奧基玄冲纂懿文虛無承先師
澄神玄漠流棲心太素域弭節欣高視俟我大夢覺

漢魏六朝百三家集卷四十九



總校官庶吉士臣侍朝

校對官庶吉士臣何思鈞

謄錄監生臣張元信

法人 釋淨空 敬贈
佛陀教育基金會

